

四庫全書

集部

欽定四庫全書

集部
山谷外集卷二

詳校官庶吉士臣胡鉅

檢討臣何思鈞覆勘

總校官進士臣朱鈐

校對官修撰臣戴衢亨

謄錄監生臣趙果

欽定四庫全書

山谷外集卷一

賦二首

劉明仲墨竹賦

子劉子山川之英骨毛粹清用意風塵之表如秋高月
明游戲翰墨龍蛇起陸嘗其餘巧顧作二竹其一枝葉
條達惠風舉之瘦地筍筍夏篁解衣三河少年稟生勁

宋 黃庭堅 撰

剛春服楚楚俠游專場王謝子弟生長見聞文獻不足
猶超人羣其一折幹偃蹇斫頭不屈枝老葉硬強項風
雪廉蔭之骨成塵凜凜猶有生氣雖汲黯之不學挫淮
南之鋒於千里之外子劉子陵雲自許按劍者多故以
歸我請觀謂何黃庭堅曰吾子於此可謂能矣猶有修
篁之歲晚枯枿之發春少者骨梗老而日新附之以傾
崖巖石摧之以冰霜斧斤第其曾高昭穆至于來昆仍
雲組練十幅烟寒雨昏迺為能盡之蓋陽虎有若之似

夫子市人識之顏回之具體門人不知蘇子曰世之工人或能曲盡其形至於其理非高人逸才不能辦意其在斯故籍外論之梓人不以慶賞成虞病僂不以萬物易蜩及其至也禹之喻於水仲尼之妙於韶蓋因物而不用吾私焉若夫燕荆南之無俗氣庖丁之解牛進技以道者也文湖州之得成竹於胸中王會稽之用筆如印印泥者也詩云鶴鳴于九臯聲聞于天妙萬物以成象必其胸中洞然好學者天不能掣其肘劉子勉旃

放目亭賦

走馬承受丁君作亭於其廨東北吾友宋楙宗以為盡
表裏江山之勝名其亭曰放目而黔江居士為之賦
放心者逐指而喪背放口者招尤而速累自作訛訛自
增憤憤登高臨遠唯放目可以無悔防心以守國之械
防口以挈瓶之智以此放目焉方丈尋常而見萬里之
外

古詩七十五首

溪上吟

并序
年十六時

春山鳥啼新雨天
霽汀草怒長竹篠交陰黃子觀漁於
塘下尋春于小桃源從以奚童稚子畦丁三四輩茶鼎
酒瓢淵明詩編雖不命戒未嘗不取諸左右臨滄波拂
白石詠淵明詩數篇清風為我吹衣好鳥為我勸飲當
其漻然無所拘係而依依規矩準繩之間自有佳處乃
知白蓮社中人不達淵明詩意者多矣過酒肆則飲亦
無量也然未始甚醉蓋其所寓與畢卓劉伶輩同而自

謂所得與二子異人亦殊不能知之也酒酣得紙書之
為溪上吟

短生無長期聊暇日婆婆出門望高丘拱木蔓春蘿試
為省鬼錄不飲死者多安能如南山千歲保不磨在世
崇名節飄如赴燭蛾及汝知悔時萬事蓬一窠青青陵
陂麥妍暖亦嬾耍長煙淡平川輕風不為波無人按律
呂好鳥自和歌杖藜山中歸牛羊在坡陀本自無廊廟
政爾樂澗阿念昔揚子雲刻意師孟軻狂夫移九鼎深

巷考四科亦有好事人時能載酒過無疑舉爾酒定知
我為何

清江引

時年
十七

江鷗搖蕩荻花秋八十漁翁百不憂清曉采蓮來盪漿
夕陽收網更橫舟羣兒學漁亦不惡老妻白頭從此樂
全家醉著蓬底眠舟在寒沙夜潮落

還家呈伯氏

葉縣
作

去日櫻桃初破花歸來著子如紅豆四時驅迫少須臾

兩鬢飄零成老醜永懷往在江南日原上急難風雨後
私田苦薄王稅多諸弟號寒諸妹瘦扶將白髮渡江來
吾二人如左右手苟從祿仕我豈回且慰家貧兄孝友
強趨手板汝陽城更責愆期被訶詬法官毒螫草自搖
丞相霜威人避走賤貧孤遠蓋如此此事端於我何有
一囊粟麥七千錢五人兄弟二十口官如元亮且折腰
心似次山羞曲肘北窻書冊久不開筐篋黃塵生鑱鈕
何當略得共討論况迺雍容把杯酒意氣敷腴貴壯年

不蚤計之且衰朽安得短船萬里隨江風養魚去作陶
朱公班衣奉親伯與儂四方上下相依從用舍由人不
由已迺是伏轅駒犢耳

流民歎

朔方頻年無好雨五種不入虛春秋邇來后土中夜震
有似巨鼇復戴三山遊傾牆摧棟壓老弱冤聲未定隨
洪流地文剗剗水膚沸十戶八九生魚頭稍聞澶淵渡
河日數萬河北不知虛幾州累累襁負襄葉間問舍無

所耕無牛初來猶自得曠土嗟爾後至將何怙刺史守
令眞分憂明詔哀痛如父母廟堂已用伊呂徒何時眼
前見安堵疎遠之謀未易陳市上三言或成虎禍災流
行固無時堯湯水旱人不知桓侯之疾初無證扁鵲入
秦始治病投膠盈掬俟河清一簞豈能續民命雖然猶
願及此春略講周公十二政風生郡口方出奇老生常
談幸聽之

次韻答張沙河

張侯堂堂身八尺老大無機如漢陰猛摩虎牙取吞噬
自歎日月不照臨策名日已汙軒冕逃去未必焚山林
我評君才甚高妙孤竹截管空桑琴四十未曾成老翁
紫髯垂頤鬱森森眉宇之間見風雅藍田烟霧生球琳
胷中礪磊政須酒東海可攬北斗斟古人已悲銅雀上
不聞向時清吹音百年毀譽付誰定取醉自可結舌瘖
使公繫腰印如斗駟馬高蓋驅駸駸親朋改觀婢僕敬
成都男子寧異今又言屋底甚縣磬兒婚女嫁取千金

古來聖賢多不飽誰能獨無父母心衆雛墮地各有命
強為百草憂春霖艾封人子暗目睫與王同牀悔沾襟
隴鳥入籠左右啄終日思歸碧山岑一生能幾開口笑
何忍更遣百慮侵忽投雄篇寫逸興仰占乾文動奎參
自陳使酒嘗罵坐惜予不與朋合簪君材蜀錦三千丈
要在刀尺成衣衾南朝例有風流癖楚地俗多詞賦淫
屈原離騷豈不好只今漂骨滄江潯政令夷甫開三窟
獵以我道皆成禽溫恭忠厚神所勞於魚得計豈厭深

丈夫身在要勉力豈有吾子終陸沉鄙人相士蓋多矣
勿作蔡澤笑噤吟

次韻時進叔二十六韻

時子河上園竹間開棟宇大兒勝衣冠小兒豐頰輔嫁
女與朱公伏臘可稱舉髮疎雖蒼浪齒嚼未齟齬雞棲
牛羊下各自有室處四牆規模小易守若滕莒舍前花
木深春物麗觀觀舍後曲池蛙齋堂風月苦此豈不足
歟歎歲不我與客宦孤雲耳未知秦吳楚向來千駟公

果愧一丘土寧當損軒昂聊欲效俯偃時子忻然笑吾
已寤倉鼠少猶守章句晚實愛農圃鵲巢最知風蟻穴
識陰雨世網事諳委醉鄉俗淳古坐忘兩家說肉堅與
腸腐酒至即使傾客來敢辭宴時邀五柳陶共過三徑
詡往在少年場豪氣壓潁汝借令今尚爾眞復難共語
稍知憐麴蘖漸解等灘漣朋友半山阿光陰共行旅人
故義當親衣故義當補飛鳧王令尹期我向君所君為
拂眠牀淹留莫城阻

水自河出為灘
自濟出為漣

二月丁卯喜雨吳體為北門留守文潞公作

乘輿齋祭甘泉宮遣使駿奔河岳中誰與至尊分盱食
北門臥鎮司徒公微風不動天如醉潤物無聲春有功
三十餘年霖雨手淹留河外作時豐

是時太母閔雨勤甚故有微風不動

之句

古風次韻答初和甫二首

饑思河鯉與河魴渴思蔗漿玉盃涼冬願純綿對陰雪
夏願綢絺度盛陽萬端作計身愁苦一事不諧鬢蒼浪

調笑天街吟海燕
藜羹脫粟非公狂

君吟春風花草香
我愛春夜璧月涼
美人美人隔湘水
其雨其雨怨朝陽
蘭茝盈懷報瓊玖
冠纓自潔非滄浪
道人四十心如水
那得夢為胡蝶狂

次韻答和甫盧泉水三首

并序

和甫作盧泉之水不求於古樂府而規模暗合予為
和成三疊自予官河外罕得逆耳之言於朋友和甫
愛我也居有藥言吾不欲其思盧泉也故作其一父

母之邦有如仲尼柳下惠而懷安之以吾之樂雙井
知和甫之不忘盧泉也故作其二坐進此道者於物
無擇清漳之波濁河之流盧泉之水求其異味而不
得也親樂之身安之斯可矣故作其三夫三言者雖
不同唯知言者領其不異也

初侯不能六尺長少日結交皆老蒼勢利不可更炎涼
解纓從我濯滄浪與君論心松柏香何為獨憶盧泉之
上多綠楊盧泉如練照秋陽泉上之人猶謗傷此邦雖

陋有佳士勿厭風沙吹茫茫願君不負上池水囊中探
丸起人死

盧泉之木百尺長下蔭泉色如木蒼蘋風荷雨洒面涼
倒影搖蕩天滄浪網登錦鱗蒲荇香何以貫之柳與楊
古來希價入咸陽貪功害能相中傷君今已出紛爭
外但思煙波春淼茫奉親安樂一杯水盧泉之濱可忘死
舍後鍾梵爐烟長舍前簾影竹蒼蒼事親煥席扇枕涼
中有一士鬢蒼浪同心之言蘭麝香與游者誰似姓楊

朝發枉渚夕辰陽懷瑾握瑜祇自傷東有濁河西清漳胡
為搔頭慮患思茫茫清明在躬不在水此曹跼躅顧心
死

招子高二十二韻兼簡常甫世弼

我行向厭次夏扇日在搖甘瓜未除壟高柳尚鳴蜩駕
言聊攝歸飛霜曉封條負薪泣裘褐公子御狐貂歲月
坐晚晚鬢顏颯然凋道德千古事斯文非一朝往者我
不及後生多見超吾黨二三子士林聳孤標小謝抱周

易忘言獨參寥崔郎楚左史二典考舜堯王生風雅學
談辯秋江潮洒筆驚有司小敵謂可驕安知樗蒲局臨
關敗三梟三生數步隔屢赴茗椀邀小謝殊未來我覺
百里遙問之憂菽水心慮極無聊父憐母不訶日以濁
酒澆此道如鼎實念子羹未調古來有親養回也樂一
瓢不田鶉生突在物乃為妖吾言有師承可信如斗杓
詩以解子憂亦用當子招

林為之送筆戲贈

閻生作三副規模宣城葛外貌雖銑澤毫心或麤糲巧
將希栗尾拙迺成棗核李慶縛散卓含墨能不洩病在
惜白毫往往半巧拙小字亦周旋大字難曲折時時一
毛亂迺似逆梳髮張鼎徒有表徐偃元無骨模畫記姓
名亦可應倉卒為之街南居時通鈴下謁晴軒坐風涼
怪我把枯筆開囊撲蠹魚遣奴送一束洗硯磨松煤揮
灑至日沒蚤年學屠龍適用固疎闊廣文困藎鹽烹茶
對秋月略無人問字况有客投轄文章寄呻吟講授費

頰舌閒無用心處雌黃到筆墨時不與人遊孔子尚愛
日作詩當鳴鼓聊自攻短闕

自和答為之

君勿嘲廣文
沍寒被絺葛
君勿嘲廣文
窮年飯粢糲
常恐俎豆予
與世充肴核
凡木不願材
大折小枝洩
櫟依曲轅社
聊用神其拙
吾家本江南
一丘藏曲折
瀕溪蔭蒼葭
蕭灑可散髮
既無使鬼錢
又無封侯骨
薄祿庇閒曹
且免受逼卒
為此懶出門
徒敝懷中謁
直齋賓客退

風物供落筆詩成著牀頭不知今幾束君何向予勤見
詩歎埋沒嗣宗須酒澆未信胷懷闊自狀一片心碧潭
浸寒月令德感來教為君賦車轄君思揚雄吒何似張
儀舌此意恐大狂願為引繩墨政使此道非改過從今
日報章望瓊琚勿使音塵闕

再和答為之

林君維閩英數面成瓜葛鄰居接杖藜過飯厭疎糲讀
書飽工夫論事極精核奮身君子場勇若怒未洩窮年

棲旅巢由命非由拙王良驅八駿方駕度九折學堂疎

雨餘石砌長苔髮弟子肥如瓠先生瘦唯骨

林君在朱氏講授朱

氏兒皆面白豐肥而林君如刻削

北門一都會塵埃人卒卒高蓋如秋

荷勢利相奔謁唯君尚寂寞來觀草玄筆斯文未易陳

政當高閣束金馬事陸沉市門逐乾沒未須相賢愚聊

自嘲迂闊憶昨戲贈詩迺辱報明月極知推挽意我車

君欲轄屠龍眞狂言奔馬不及舌賜書盈五車直舍方

二墨會意便欣然餘事過窻日尚恐素餐錢諸生在城

關

贈趙言

饒陽趙方士眼如九秋鷹學書不成不學劍心術妙解
通神明醫如俯手拾地芥相如仰面觀天星自言方術
雜鬼怪萬種一貫皆天成大梁卜肆傾賓客二十餘年
聲藉藉得錢滿屋不經營散與世人還寄食北門塵土
滿衣襟廣文直舍官槐陰白雲勸酒終日醉紅燭圍碁
清夜深大車駟馬不回首強項老翁來見尋向人忠信

去表襮可喜政在無機心輕談禍福邀重督所在多於
竹葦林翁言此輩無足聽見葉知根論才性飛騰九天
沉九泉自種自收皆在行先期出語駭傳聞事至十九
中時病輪困離奇惜老大成器本可千萬乘自嘆輕霜
白髮新又去驚動都城人都城達官老於事嫌翁出言
不斌媚有手莫炙權門火有口莫辯荆山玉吳宮火起
燕焚巢當時卞和斲兩足千里辭家却入門三春榮木
會歸根我有江南黃篋舫與翁長入白鷗羣

次韻晁補之廖正一贈答詩

晁子抱材耕谷口世有高賢踐台斗頃隨計吏西入關
關夫數日傳車還封侯半屬妄校尉射虎猛將猶行間
無因自致青雲上浪說諸公見嗟賞驥伏鹽車不稱情
輕裘肥馬鳳凰城歸來作詩謝同列句與桃李爭春榮
十年山林廖居士今隨詔書稱舉子文章宏麗學西京
新有詩聲似侯喜君不見古來良為知音難絕絃不為
時人彈已喜瓊枝在我側更恨桂樹無由攀千里風期

初不隔獨憐形迹滯河山

再次韻呈廖明略

吾觀三江五湖口湯湯誰能議升斗物誠有之士則然
晚得廖子喜往還學如雲夢吞八九文如壯士開黃間
十年呻吟江湖上青楓白鷗付心賞未減北郭漢先生
五府交書不到城

漢汝南
廖扶

相者舉肥驥空老山中無人

桂自榮君既不能如鍾世美匭函上書動天子且向華
陰郡下作參軍要令公怒令公喜君不見晁家樂府可

管絃惜無傾城為一彈從軍補掾百僚底九關虎豹何
由攀男兒身健事未定且莫著書藏名山

走答明略適堯民來相約奉謁故篇未及之

君不見生不願為牛後寧為雞口吾聞向來得道人終
古不忒如維斗希價咸陽諸少年可推令往挽令還俗
學風波能自拔我識廖侯眉宇間省庭無人與爭長主
司得之如受賞東家一笑市盡傾略無下蔡與陽城生
珠之水砂礫潤生玉之山草木榮觀君詞章亦如此諒

金仁居先生集 卷一
知躬行有君子更約探囊閱舊文蛛絲燈花助我喜賢
樂堂前竹影斑好鳥自語莫吟蟬北鄰著作相勞苦整
駕謁子邀同攀應煩下榻煮茶藥坐待月輪銜屋山

答明略并寄無咎

可以忘憂唯有酒清聖濁賢皆可口前日過君飲不多
明日解醒無五斗古木清陰丹井欄夜來涼月屋頭還
論交撥置形骸外得意相忘樽俎間冰壺不可與夏蟲
饗秋月不可與俗士賞已得樽前兩友生更思一士濟

陽城雖無四至九卿之規畫猶有千秋萬歲之眞榮空
名未食太倉米今作斑衣老萊子卿家嗣宗望爾來不
獨我聞足音喜西風索寞葉初乾長鋏歸來亦罷彈窮
巷蓬蒿深一尺朱門廉陛高難攀吾儕相逢置是事百
世之下仰高山

再次韻呈明略并寄無咎

夏雲涼生土囊口周鼎湯盤見科斗清風古氣滿眼前
乃是戶曹報章還只今書生無此語已在貞元元和間

一夫謬謬獨無望千夫唯唯皆論賞野人泣血漫相明
和氏之璧無連城參軍拄笏看雲氣此中安知枯與榮
我夢浮天波萬里扁舟去作鷗夷子兩士風流對酒樽
四無人聲鳥聲喜夢回擾擾仍世間心如傷弓怯虛彈
不堪市井逐乾沒且願朋舊相追攀寄聲小掾篤行李
落日東面空雲山

再答明略二首

挾策讀書計餬口故人南箕與北斗江南江北萬重山

千里寄書聲不還當時朱絃寫心曲果在高山流水間
枯桐滿腹生蛛網忍向時人覓清賞廖侯文字得我驚
五岳縱橫守嚴城萬夫之下不稱屈定知名滿四海非
眞榮富如春秋已如此他日卜隣長兒子一丘各自有
林泉扶將白頭親宴喜秋風日暮衣裳單深巷葉落已
如彈數來會面復能幾六龍去人不可攀短歌溷公更
一和聊乞淮南作小山

廖侯言如不出口銓量古今膽如斗度越崔張與二班

古風蕭蕭筆追還前日辭家來射策聲名籍甚諸公間
華陰白雲鎖千嶂勝日一談誰能賞君不見曩時子產
識然明知音鬱鬱閒佳城勿以匣中之明月計校糞土
之朝榮我去丘園十年矣種桑可蠶犢生子使年七十
今中半安能朝四暮三浪憂喜據席談經只強顏不安
時論取譏彈愛君草木同臭味頗似瓜葛相依攀我有
仙方煮白石何時期君藍田山

次韻感春五首

我與子桑友既往雨彌旬交情未曾改天地忽趨新東
風無行迹佳氣滿城門麥苗生陂隴歎息不食陳誰能
裹飯來定是寂寞人一曲古流水試拂絃上塵古木少
生意輪囷臥河濱慙愧桃與李相隨見陽春

張侯脫朝衣兒褐多純綠聞道無米舂煮術學辟穀官
吏但索錢詔書哀惻獨東方長九尺不得侏儒祿屋中
聲鵝鴈日暮攬心曲窮巷無桃李緹袍非春服我吟白
駒詩知君在空谷

祁寒不可怨天道自平分及爾春風來四肢有餘溫丈
夫力如虎為人行灌園椒蘭土壅蔽未可怨芳蓀寒魚
守窮轍蒙煦一沫恩一朝被湔拂吹毛見癰痕

鳥聲春清長煙雨春薄暮風光不長妍如客暫時寓芸
芸物爭時天地有常度我行覩大河黃流日東驚喟然
欲乘桴莽不見洲渚張侯但飲酒無用恨羈旅十年富

貴子今作一邱土

富貴子一作尊前客

茶如鷹爪拳湯作蠃眼煎時邀草玄客晴明坐南軒笑

談非世故獨立萬物先春風引車馬隱隱何聞聞高蓋
相摩戛騎奴爭道喧吾人撫榮觀宴處自超然城中百
年木有鵲巢其顛鳴鳩來相宅日莫更謀遷

鳴鳩作
雄鳩

聖東將寓于衛行乞食于齊有可憐之色再次韻

感春五首贈之

溫氣冰底歸忽忽六過旬園林改柯葉鳥聲日日新耕
稼百年外四郊無短門高立試遠望俯仰迹已陳信陵
松鬱鬱不見曩時人空懷負暄賞更望屬車塵腹中書

萬卷踣死溝壑濱投壺與射覆一笑物皆春

種萱欲遣憂叢薄空自綠洗心日三省人亦不我穀誰
能書窻下草玄抱幽獨白首官不遷校書漢天祿身當
萬戶侯鼓吹擁部曲解佩著犀渠張弓插彫服何時李
將軍射獵出上谷

春風鳴布穀天道似勸分持飢望路人誰能顏色溫笑
憶枯魚說談諧老漆園湘纍不得祿哀怨寫荃蓀千年
澗谷松慚愧雨露恩思為萬乘器願掩斧鑿痕

風雨桃李華佳人來何暮安齊果未安寓衛豈所寓張
侯室縣罄得酒美無度常憂腐腸死須我嫁阿鷺雙魚
傳尺書何處迷春渚啼鳥勸不歸曉鞍逐行旅遙知登
樓興信美非吾土

魯公但食粥百口常憂煎金張席貴寵奴隸乘朱軒丈
夫例寒飢萬世無後先風霾天作惡雷亦怒聞聞俄頃
花柳靜烟暖谷鳥喧人事每如此翻覆不常然下流多
謗議高位又疾顛空餘壯士志不逐四時遷

謝張泰伯惠黃雀鮓

去家十二年黃雀慳下筯笑開張侯盤湯餅始有助蜀

王煎穀法醯以羊羶兔

俗謂亥卯未餽鈍

麥餅薄於紙含漿和

鹹酢秋霜落場穀一一挾繭絮殘飛蒿艾間人網輒萬

數烹煎宜老稚覺缶煩愛護南包解京師至尊所珍御

玉盤登百十睥睨輕桂蠹五侯噉豢豹見謂美無度瀕

河飯食漿瓜蒔已佳茹誰言風沙中鄉味入供具坐令

親饌甘更使客得與蒲陰雖窮僻勉作三年住願公且

安樂分寄尚能屢

次韻謝子高讀淵明傳

枯木嵌空微暗淡古器雖在無古弦袖中政有南風手
誰為聽之誰為傳風流豈落正始後甲子不數義熙前
一軒黃菊平生事無酒令人意缺然

奉答子高見贈十韻

柳徑雨著綿竹齋風隕籜屏處人事少晴餘鳥聲樂詩
卷墮我前謂從天上落君有古人風詩如古人作簞瓢

謝膏梁翰墨化糟粕誤蒙東海觀吾淺陋可酌真成聞
道百自謂莫已若謝生石蘊玉志尚本丘壑雖無首陽
粟飲水亦不惡覺然何時來為我一發藥

次韻孔著作早行

棄置鉏犁就車馬從來計出古人下塵埃好在三尺桐
不疑萬世期子野明經使者著書郎風雨乘驛忘夙夜
回車過門問無恙何意深巷勤長者聖師之後蓋多賢
領略世故有餘暇白而長身雖不見好古發憤尚類也

自然身如警露鶴每先鳴雞整初駕北行河決所至郡
肅肅王命哀鰥寡力排滹沱避城郭深澤疲民且田舍
賈生三策藏胷中羿矢百中不虛捨行歸定拜闕內侯
但賜黃金恐非價

次韻無咎閭子常攜琴入村

士寒餓古猶今向來亦有子桑琴倚檻嘯歌非寓淫伯
牙山高水深深萬世丘壘一知音閭君七絃抱幽獨晁
子為之梁父吟天寒絡緯悲向壁秋高風露聲入林冷

絲枯木拂蛛網十指乃能寫人心村村擊鼓如鳴鼙豆
田見角穀成螺歲豐寒士亦把酒滿眼飮餽梨棗多晁
家公子屢經過笑談與世殊舊科文章落落映晁董詩
句往往妙陰何閻夫子勿謂知人難使琴抑怨久不和
明光晝開九門肅不令高才牛下歌

贈晁次膺

次膺豪健如霜鷗空拳誤掛田犬牙果輸司空城旦作
付與步兵厨人家野馬橫郊作凝木牽牛引竹上寒花

無酒醉公不甚惜誦公五字使人嗟

春游

終日桃李蹊春風不相識同我二三子承我作意力把
酒忘味著看花了香寂晴雲散長空曠蕩無限隔身為
胡蝶夢本自不漁色春蟲勸人歸今我誠是客歸來翻
故紙書尾見麟獲文字非我名聊取二三策

同堯民游靈源廟廖獻臣置酒用馬陵二字賦詩
靈源廟前木我昔見拱把七年身屢到鬱鬱蔭簷瓦春

風響馬銜並轡客
瀟灑更願少尹賢
置酒意傾寫齋堂
有佳處花柳輕姪
姹蓮塘想舊葉稻
畦識枯苴開關撫
洪河黃流極天瀉
憶昔武皇來繫壁
沉白馬從官親土
石襁負至鰥寡空
餘瓠子詩哀怨逼
騷雅白圭自聖禹
今誰定真假晁子
發讜言聖功諒難
亞排河著地中勢
必千里下移民就
寬閒何地不耕稼
此論似太高吾亦
茫取舍有器可深
川吾未之學也

洪河壯觀游太府
佳友朋春色挽我
出東風如引繩昏

昏版築氣王事始繁興大堤如連山小堤如岡陵增卑
更培薄萬杵何登登憶昨河失道平原魚可罾田萊人
未復瘡大國方懲忽念耒耜閒為民保丘塍百縣伐磬
出夜半廢曲肱吾儕愧祿廩游衍事鞍乘晁子漢公孫
新去司馬丞出幹太農部才術見嗟稱我坐廣文舍七
年讀書燈結髮入場屋肯謂河難憑爾來觸事短癡甚
霜前蠅世味極淡薄不了人愛憎唯得一卮酒尚能別
淄澠所以對樽俎未曾問斗升酌我良已多狂言恐侵

陵暮雲吞落日歸鳥求其朋

復用前韻

冷官僕馬瘦及門鼓

騰騰

奉和王世弼寄上七兄先生用其韻

宮槐弄黃黃蓮葉綠婉婉時同二三友竹軒涼夏晚駕
言都城南以望征車返何知苦淹留及此秋景短愁思
令人瘦舉目道路遠西風脫一葉薦士聞鄉選簡書催
渡河賓客不得展親憂對萱叢婦病廢巾盥言趨厭次
城鞭馬倦長阪棗林蔽天日交陰不容繖仰看實離離

憶見花纂纂異鄉懷節物不共斟酒盞舉場下馬入深
鎖嚴籥管諸生所程書據束若稽稗蜜燈坐回環丹硯
精料東披榛拔芝蘭斷石收琰琬紛爭一日事聲實溷
端竅天球或棄遺斗筭尚何算西歸到官舍塵土昏案
板寒窻穿碧疏潤礎鬧蒼蘚詩書鵲巢翻帷幔蛛絲胃
果知兄未來光陰坐晝晚昨蒙叔父報亦歎音書簡薄
言使事重激切被天遣逋流一方病責任媿和扁咨詢
懷靡及不皇暇息偃嚼冰進糜飧衝雪踏層巘嚴霜八

月飛貂狐無餘煥念嗟叔母劉窮年寄甥館尚憐公初
黠誘掖到昭宛庭堅薄才資行又出町疃浮雲與世疎
短綆及道淺匠伯首斲回大樗終偃蹇學宮尸廩入奉

養闕豐腴學徒日新聞孤陋猶舊典小材渠困我持斲

問輪扁

復用此一韻
事異似不害

大材我屈渠越鷄當鵠卵未能引

分去戀祿幸苟免平生報一飽從事極黽勉豈知不見
收放身就閒散思伯臥江南無心趣軒冕龐翁跡頗親
黃蘗門屢款齋餘佛飯香茶沸甘露滿逢人問進退餘

事寄一莞仲父挾高材甘為溝中斷

短音

青黃可犧樽薦

廟配瑚璉季父有逸興未嘗入都輦臨流呼釣舫拂石
弄琴阮雍容從朋交林下追遊衍田園雖足樂及時思
還返陰寒不鳴條望損倚門眼南枝喜鵲鳴尺素託黃
犬又以窀穸留歸期指姑洗寄聲問僧護兒髮可以綰
妙言對賓客稱渠萬金產爾來弄筆硯墨水惡翻建

音塞

大字如栖鴉已不作肥軟魯論未徹章政苦諸叔懶新
詩開累紙欲罷不能卷遠懷託孤高別思盈繾綣秋月

明夜潮枯漿凍金枕疎杵韻寒砧幽泉流翠筧吟哦口
垂涎嚼味有餘雋傳示同好人我家東牀坦風煙意氣
生揮毫寫藤璽獵山窮鷄駕罩海極蝦蜨銀釣亂眼膜
嘉句濯肺腕且言伯在野朋友必推挽五泰列清廟聖
緒今皇纘眞儒運斗樞道化迪天顯朝論惜才難逸民
大蒐獮豸聞任方物包貢遺羽籥招車必翹翹前席思
謇謇王甥欲好懷高意恐難轉長篇題遠筒封寄淚空
潛遙知雲際開灰飛黃鐘管

贈張仲謀

車如鷄栖馬如狗閉門常多出門少去天尺五張公子
官居城南地館好健兒快馬紫游韉迎我不知沙路長
江榆溪柳媚寒日枯荷小鴨凍野航津人刺船起應客
遙知故人一水隔下馬索酒呼三遲騎奴笑言客竟癡
向來情義比瓜葛萬事略不置町畦追數存亡異憂樂
燭如白虹貫酒卮閒軒臨水弄長笛吹落殘月風淒淒
城頭漏下四十刻破魔驚睡聽新詩君詩清壯悲節物

政與秋蟲同一律爾來更覺苦語工思婦霜碓擣寒月
朱顏綠髮深誤人不似草木長青春潔身好賢君自有
今日相看進於舊以茲敢傾一盃酒為太夫人千歲壽

送薛樂道知鄆鄉

黃山葉縣連牆居謝公席上對樗蒲雙鬟女弟如桃李
蚤許歸我舍中鷗平生同憂共安樂歲晚相望青雲衢
去年樽酒輦轂下各喜身為反哺烏城頭歸烏尾畢逋
春寒啄雪送行車解珮我無明月珠折柳下對千里駒

念君胷中極了了作吏辦事猶詩書濁酒挽人作年少
關防心地亦時須鄖鄉縣古民少訟但問自己不關渠
登臨一笑雙白髮宜城凍筍供行厨人生此樂他事無
行李道出漢南都寄聲諸謝今何如謝公書堂迷竹塢
手種竹今青青否我思謝公淚成雨屬公去漉穰下土
送張沙河遊齊魯諸邦

張侯去沙河三食鄴下麥筆力望晁董頗遭俗眼白平
生學經綸胷中負奇畫未論功活人飽飯不常得妻寒

尚賓敬兒餓猶筆墨側聞共伯城魚稻頗宜客又待塵
生甑欲往立四壁平生貸米家十輩來薄責囊無孔方
兄面有在陳色守株伺投兔歲晚將何獲廣道無人行
春風轉沙石栖栖馬如狗去謁東侯伯布衣未可量蒼
髯身八尺魚乾要斗水士困易為德譬之舉大木人借
一臂力諸公感意氣豈待故相識吾窮乏祖餞折柳當
馬策

送吳彥歸番陽

學省困蠶鹽人材任尊獎空筒祝螟蛉小大器嬰旒諸
生厭晚成躡學要僧馭摹書說偏旁破義析名象九鼎
奏簫韶爰居端不饗青衿少到門庭除書閒敞竹風交
槐陰三見秋氣爽時賴解事人載酒直心賞吳郎楚國
材幽蘭秀榛莽彥國吐嘉言子將喜標榜平生欽豪俊
久客慕鄉黨虛齋延灑掃飯薦脍鯢詩句唾成珠笑
嘲恹爬痒春夏頻謝除曾未厭來往歸鴈多喜聲寒蟬
停哀響黃花滿籬落白蟻鬧甕盎留君待佳節忽忽戒

徂兩親戚傷離居交游念疇曩基局無對曹樗蒲失朋
長問君去為何雲物愁莽蒼壽親髮斑斑千里勞夢想
家雞藁頭肥寒魚受罾網甘旨敕中厨伊啞弄文襴此
行樂未央安知川塗廣深秋上滄江遠水平如掌人生
要得意壯士多曠蕩野鶴疲籠樊江鷗戀菰蔣本來丘
壑姿不著芻豢養寄聲謝鄉鄰為我具兩漿有路即歸
田君其信非誑

薛樂道自南陽來入都留宿飲會作詩餞行

薛侯本貴胄射策一矢中金蘭託平生瓜葛比諸從數
面尚成親况乃居連棟交游及父子講學連伯仲奴人
通使令孩稚接戲弄相憐負米勤同力采蘭供每持君
家書平安覲款縫秦人與吾炙憂樂一體共釋之廷尉
曹微過成繫訟從此張長公不肯為時用丘阿無梧桐
曲直不在鳳生涯谷口耕世事邯鄲夢自君抱憂端酒
椀未忍喫借今秋忽來歸意氣稍寬縱黃花尚滿籬白
蟻方浮甕私言願燕喜且莫戒輜重霜風獵帷幕銀燭吐

蟬竦密坐幸頗歡劇飲寧辭痛疎鐘鳴曉撞小雨作寒
霧廢馬蕭蕭鳴征人稍稍動九衢槐柳中縱緩青絲鞵
朱樓豪士集紅袖清歌送河鯉獻鱸材江橙解包貢蟹
擘鵝子黃酒傾琥珀凍舉觴遙酌我發噓知見頌行行
鞭箠倦短句煩屢諷

次韻奉送公定

去年君渡河棗下實離離今年君渡河剝棗詠幽詩直
緣恩義重不憚鞍馬疲詩書半行李道路費歲時親交

歎存歿學問訪闕遺我多後時悔君亦見事遲即此有真
意定非兒女知虛名無用處北斗與南箕燕趙游俠子
長安輕薄兒狂掉三寸舌躡登九級墀覆手雲雨翻立
談光陰移歃血盟父子指天出肝脾從來國器重見謂
骨相奇築巖發夢寐獵渭非熊螭百工改繩墨一世擅
文詞全人脰肩肩甕盎嫵且宜大槐陰黃庭女蘿綿絡
之韶陽兩兄弟還自妬蛾眉工顰又宜笑百輩來茹咨
班姬輕鴻毛更合衆口吹引繩痛排根音病蒙蔽枉成帷

唯恐出已上殺之如奕棊塵埃百年琴絕絃為鍾期落
落虎豹文義難管中窺至今揚子雲不與俗諧嬉歲晚
草玄經覃思寫天維脫身天祿閣危於劍頭炊臥聞策
董賢閉門甘忍飢五侯盛賓客騶轡交橫馳時通問字
人得酒未曾辭近者君家翁天與脫事機已為冥冥鴻
矰繳尚安施養蘭尋僧圃愛竹到水湄北關免朝請西
都分保釐文章九鼎重富貴一黍累趙良欲灌園但為
商君嗤棄甲尚文過兕多牛有皮出仕書掣肘歸來菊

荒籬不為五斗折自無三徑資勝箭洗蹠血歸鞍懸月
支斯人萬戶侯造物付鑪錘我觀史臣篇疏略記糟醕
譬如官池蛙誰能問公私君懷明月珠簸弄滄海涯深
房珮芳蘭固是王所姬南貢尚包橘漢濱莫大隨每來
捉談麈風生塵竹枝骯髒得家法伊優不能為但聽呼
檣蒲便足解人頤功成在漏刻穎利處囊錐失勢落坑
穽寒窀如愁鵠得馬折足禍亡羊多歧悲屢敵因心計
伏兵幾面欺長戈仰關來吐款受羈縻萬事只如此畢

竟誰成虧愛君方寸間醇朴乃器師安得擺俗纏東崗
並鉏犁由來在陰鶴不必振羽儀送行傾車蓋載酒滿
鵬夷天高木落葉潦退河流卑屯雲塞六幕新月吐半
規人生會面難取醉聽狂癡語牢發期笑一作欺笑詩鋒犯

嘲譏懸知履霜來少別為不怡天津媚河漢闕角掛秋
霓中有鬼與神赤舌弄陰機夜光但十襲出懷即瑕疵
去去善逆旅凍醪約重持山藥倒藤架紅梨帶寒曦坐
須騎奴還淹留歲恐期無為出門念牽衣嬰孺啼短韻

願成頌時時寄相思

種決明

后皇富嘉種決明注方術耘鋤一席地時至觀茂密縹
葉資芼羹細花馬蹄實霜叢風雨餘簌簌場功畢枕囊
代曲肱甘寢聽芬苾老眼願力餘讀書眞成癖

都下喜見八叔父

一別七冬夏幾書通置郵冥鴻難借問江鯉多沉浮心
因夢想去迹為山川留叔趨丹鳳闕身向臥龍洲邂逅

入關馬同時解轡鞅別後事萬端向來身百憂咨嗟舊
田園慟哭新松楸稍詢耆舊間大半歸山丘小兒攜婦
子襁褓皆裹頭清燈照逆旅呼酒濯亂愁破啼為笑語
霜夜盡更籌歲寒叔舊節況又高春秋老松心梗槩綠
竹氣和柔言如不出口體若不勝裘德音潤九里政事
無全牛詩成戲筆墨清甚韋蘇州篆籀有志氣當於古
人求自悲聞道晚涉世如虛舟雖無觸物意儻亦遭罵
咻稍窺性命學未窮言行尤息心待自信渺如大河流

隄防小不密一決敗數州安得心服禮不見為瘡疣荆
雞變化材鵠卵滯陰幽願因啄抱力浩蕩碧雲游

次韻答叔原會寂照房呈稚川

客愁非一種歷亂如蜜房食甘念慈母衣綻懷孟光我
家猶北門王子渺湖湘寄書無鴈來衰草漫寒塘故人
哀王孫交味耐久長置酒相暖熱愜於冬飲湯吾儕癡
絕處不減顧長康得閒枯木坐冷日下牛羊坐有稻田
衲頗薰知見香勝談初疊疊修綆汲銀牀聲名九鼎重

冠蓋萬夫望老禪不掛眼看蝸書屋梁韻與境俱勝意
將言兩忘出門事袞袞斗柄莫昂昂月色麗雙闕雪雲
浮建章苦寒無處避唯欲酒中藏

同王稚川晏叔原飯寂照房

高人住寶坊重客款齋房市聲猶在耳虛靜生白光幽
子遺淡墨窻間見瀟湘蒹葭落鳬鴈秋色媚橫塘博山
沉水煙淡與人意長自攜鷹爪牙來試魚眼湯寒浴得
溫溲體淨心凱康盤飧取近市厭飫謝羶羊裂餅羞豚

膾包魚芰荷香平生所懷人忽茲共榻牀常恐風雨散
千里鬱相望斯游豈易得淵對妙濠梁雅人王稚川易
親復難忘晏子與人交風義盛激昂兩公盛才名宮錦
麗文章鄙夫得秀句成誦更懷藏

次韻叔原會寂照房

風雨思齊詩草木怨楚調本無心擊排勝日用歌嘯僧
窻茶煙底清絕對二妙俱含萬里情雪梅開嶺徼我慙
風味淺砌莎慕松蒿中朝盛人物誰與開顏笑二公老

諳事似解寂寞釣對之空嘆嗟樓閣重晚照

次韻稚川

平生萬里興斂退著寸尺向來類竊釣少日已爭席曩
過招提飯愜當易為適食鮭如舉士名下無遺索談餘
天雨花茶罷風生腋誰言塵土中有此坐上客言前傾
許可曾次開塲塞同是蠹魚癡還歸理編冊長安千門
雪蟹黃熊有白更約載酒行無為守岑寂

竹軒詠雪呈外舅謝師厚并調李彥深

破臘春未融土膏寒不發數聲鳴條風一夜灑窻雪開
軒萬物曉落勢良未歇鏗鏗青琅玕閱此歲凜冽摧埋
頭搶地意氣終自潔君子謂此君全身斯明哲屋頭維
女貞顏色少澤悅稍能窺藩籬亦有固窮節佳興冉冉
生門外無車轍寫之朱絲絃清坐待明月

丙寅十四首效韋蘇州

并序

二月丙寅率李原彥深謝愔公靜游百花洲適為游
人所擅見拒於晨門因賦何人有酒身無事誰家多

竹門可款

雪盡草木動春融煙景和嘉辰掩關坐如此節物何同
游得二子晤對不在多

不知鞍馬倦想見洲渚春清晝鑠芳園誰家停晝輪高
柳極有思向風招游人

漸佳樓外花嘉賞亭邊柳作者歸山丘今春為誰有千
秋萬歲後還復來游否

漸佳樓陽夏謝希深
作嘉賞亭范文正作

城南有佳園風物迎馬首但賞主人竹不飲主人酒紅

日媚紫苔輕風泛青柳

三公未白髮十輩乘朱輪只取人看好何益百年身但願長今日清樽對故人

江梅香冷淡開遍未全疎已有耐寒蝶雙飛上花須今夜嚴城角肯留花在無

我思五柳翁解作一生事得錢送酒家便靜尋山寺念我還如此翁應會人意

庭空日色靜樓迴鐘聲遲褐叟已爭席馴鴉更不疑同

來復同去竟別我為誰

謝甥有逸興李髯非不嘉
苦思夢春草醉狂眠酒家
斯游無俗物傲晚至昏鴉

寺古老僧靜亭陰脩竹多
萊公作州日部曲屢經過
衆推識公面蒼石眠綠莎

盛時衆吹噓謫去衆毀辱
不為公存亡幽蘭春自綠
欲書見相傳安得南山竹

昔公調鼎實指顧九廟尊
郡國富士馬于今開塞垣
誰

能起公死為國守北門

出身世喪道解綬飢驅我杯中得醉鄉去就不復果豈
謂俗人言達人儻予可

少小尚狷介與常人不款置身稍雍容遇酒輒引滿自
是鶴足長難齊鳬脰短

對酒歌答謝公靜

我為北海飲君作東武吟看君平生用意處蕭洒定自
知人心南陽城邊雪三日愁陰不能分皂白摧輪踟蹰

泥數尺城門晝閉眠賈客移人僵尸在旦夕誰能忍長
待食麥身憂天下自有人寒士何者愁填臆民生政自
不願材可乘以車可鞭策君不見海南水沈紫旃檀碎
身百煉金博山豈如不蒙斧斤賞老大絕崖霜雪間投
身有用禍所集何況四達之衢井先汲昨日青童天上
回手捧玉帝除書來一番通籍清都闕百身書名赤城
臺飛昇度世無虛日恠我短褐趨塵埃顧謂彼童子此
何預人事但對清樽即眼開一杯引人著勝地傳聞官

酒亦自清徑須沽取續吾瓶
南山朝來似有意今夜儻
放春月明

戲贈彥深

李原字彥深厚
之弟居南陽

李髯家徒立四壁未嘗一飯能留客
春寒茅屋交相風
倚牆捫虱讀書策老妻甘貧能養姑
寧剪髮鬢不典書
大兒得殮不索魚小兒得禪不索襦
庾郎鮭菜二十七
太常齋日三百餘上下分膳一飽飯
藏神夢訴羊躉蔬
世傳寒士有食籍一生當飯百甕
菹冥冥主張審如此

附郭小圃宜勤鉏葱秧青青葵甲綠早韭晚菘羹糝熟
充虛解戰賴湯餅笔以蒔藟與甘菊幾日隣槐已著花
一心呪笋莫成竹羣兒笑髯窮百巧我謂勝人飯重肉
羣兒笑髯不若人我獨愛髯無事貧君不見猛虎即人
厭麋鹿人還寢皮食其肉濡需終與豕俱焦飫肥擇甘
果非福蟲蟻無知不足驚橫目之民萬物靈請食熊蹯
楚千乘立死山壁漢公卿李髯作人有佳處李髯作詩
有佳句雖無厚祿故人書門外猶多長者車我讀揚雄

逐貧賦斯人用意未全疎

寄南陽謝外舅

謝公遂偃蹇南陽無舊廬天與解纓紱元非傲當塗庖
丁釋牛刀衆手斫大觚白雲曲肱臥青山滿牀書妙質
落川澤果然天網疎然知一作故知今人巧未覺古人迂築

場歲功休夜泉鳴竹渠曾懷鬱磊砢此物諒時須兒能
了翁事安用府中趨孫能誦翁詩乃是千里駒人生行
樂耳用舍要自如我方神其拙社櫟官道樗公猶憂斧

斤脾睨斲樽壺萬古身後前芭蕉秋雨餘少年喜狡獪
叱化粒成珠謨功可歌舞學古則暖姝所好果不同未
可一理驅眇忠忘言對安得南飛鳬鄙心生蔓草萌芽
望耘鉏離筵如昨日春柳見霜枯未辱錦繡段時蒙雙
鯉魚憶在參儿杖雍容觀規模引接開藻鑒高明通事
樞門生五七輩寂寞半白鬚談經落塵尾行樂從籃輿
看竹辟疆宅閱士黃公壚雪屋煮茶藥晴簷張畫圖幽
寺促燈火青氎置檮蒲遶牀叫一擲十白九雉盧蔡澤

來分功袁耽必上都開旗縱七走破竹殄羣胡成梟燭
為明挾長朋佐呼終飲見溫克所爭匪錙銖誰令運甕
翁見謂牧豬奴事託丈人重乃愛屋上烏舊言如對面
形迹滯舟車風簾想隱几天籟鳴寒梧尚喜讀書否還
能把酒無鄴城渺塵沙冠蓋若秋葉相過問寒溫意氣
馳九衢楚客雖工瑟齊人本好竽永懷溟海量北斗不
可斟勝夜親筆墨因來明月珠

次韻正仲三丈自衡山返命舍驛過外舅師厚贈答

昏昏市井氣咕咕兒女語禽喧聲百種春作事萬緒人
間鷄黍期天上德星聚乖離略十年髮白齒齟齬太史
禱衡丘佐王用貔虎子雲免大夫草玄空自苦人生只
爾是付與甕頭醕

山谷外集卷一

欽定四庫全書

山谷外集卷二

宋 黃庭堅 撰

古詩七十八首

次韻謝外舅病不能拜復官夏雨眠起之什

丈人養病臥此道取衆棄強飯尚可飽力田苦常匱欲
從羣兒嬉出語不斌媚軒窗坐風涼編簡勘遺墜自安
井無禽未歎旅焚次夏暑極陽功時霖作陰事呼兒疏

藥畦植杖按瓜地南山雲氣佳北極冕旒邃自欣鬢髮
白得見衣裳治山林收枯槁草木洗憔悴舐痔以車來
探珠遭龍睡腹便時蒙嘲身退得自恣伊優無下僚骭
髒謝高位誰能領斯會好在漆園吏

次韻師厚五月十六日視田悼李彥深

彥深去年五月十三

日與之
游西郊

南鴈傳尺素飛來臥龍城頗知高臥久忽作田野行湛
湛陂水滿欣欣原草榮日華麗山川秀色奪目精對酒

不滿懷攬物有餘清
念惜讀書客遠人遺世
情南畝道觀餉西郊
留勸耕共遊如昨日
笑語絕平生此士今已矣
賓筵老無成猶倚謝安石
深心撫嫠俾

老無成一作無老成

次韻師厚食蟹

海饌糖蟹肥江醪白蟻醇
每恨腹未厭誇談齒生津
三歲在河外霜臍常食新
朝泥看郭索暮鼎調酸辛
趨蹌雖入笑風味極可人
憶觀淮南夜火攻不及晨
橫行葦葦中不自貴其身
誰憐一網盡大去河伯民
鼎司費萬

錢玉食羅常珍吾評揚州貢此物真絕倫

次韻謝外舅食驢腸

垂頭畏庖丁趨死尚能鳴說以雕俎樂甘言

闕

千金轡死得五鼎烹禍胎無腸胃殺身和椒橙

闕

道貫魚百十并駢奴吹一呖駟駿不敢爭物材苟
當用何必渥洼生忽思麒麟種突兀使人驚

次韻師厚答馬著作作屢贈詩

嘗聞馬南郡少有拔俗韻寒灰幾見溺鍛翮常思奮桐

薪鳴竈間劒氣吐吳分多言世益蚩當律心自隱家雖
四立壁仕要三無愠會將漁父意往就莊生問

和答師厚黃連橋壞大木亦為秋電所碎之作

溪橋喬木下往歲記經過居人指神社不敢尋斧柯青
陰百尺蔽白日烏鵲取意占作窠黃泉浸根雨長葉造
物著意固已多風摧電一作電打掃地盡竟莫知為何譴

訶獨山冷落城東路不見指名終不磨

次韻外舅謝師厚病間十首

貝錦不足歌請陳江漢詩美人出江漢窈窕世未窺折
蘭不肯珮告我以蠶飢獨歸豈憚遠三危露如飴

德人更疾疾術智益灑落反身見萬古道不在卜度習
中有鏤錡老境要志弱謝公賦達生達生真可託

引鏡照清骨驚非曩時人天地入喻指芭蕉自觀身程

力則已病征財又室貧古來支離粟帛王所仁

一作主至

仁

菹寒知園秋飯白問米賤婦孫勸甘旨霜兔頗宜麵黃

花不舉酒佳句餘嫖戀經行宴坐堂鼠迹書几硯

桃李一春期松栢千歲永經玄事寂寞髮白官閒冷草

綠艾如張波清蟻伺影東里與無趾渠有幸不幸

病餘兒廢鋤

一作呼兒鋤

門巷草芊眠來者何所聞披草足

蛩然封侯無骨相為賈寡金錢夢作白鷗去江湖水黏

天

民生自煎熬煮豆以萁爨居然忘本根光陰不供翫藏
山夜半失烏合歸星散因病見不生達人果大觀

開田種白玉飽牛事耕犁雨露非無澤得秋常苦遲猛
虎擅文章斑斑被諸兒長松抱勁節唯有歲寒知

謝公蒔蘭苔眞意付此物惠然風肯來香為一披拂遙
知醉吟姿黽勉向朱紱措筇橘柚黃僧屋對像佛

身病心輕安道肥體癯瘦好懷當告誰四牆棗紅皺負
暄不可獻捫虱坐清晝端有眞富貴千秋萬年後

和謝公定征南謠

傳聞交州初陸梁東連五溪西氏羌軍行不斷蠻標盾

謀主皆收漢畔亡合浦譙門腥血沸晉興城下白骨荒
謀臣異時坐致寇守臣今日愧包桑已遣戈舩下灘水
更分樓舩浮豫章頗聞師出三鵞路盡是中屯六郡良
漢南食麥如食玉湖南驅人如驅羊營平請穀三百萬
祁連引兵九千里少府私錢不可知大農計歲今餘幾
土兵蕃馬貔虎同蝮蛇毒草篁竹中未論芻粟捐金費
直愁瘴癘連營空我思荊州李太守欲募蠻夷令自攻
至今民歌尹殺我州郡擇人誠見功張喬祝良不難得

誰借前筭開天聰詔書哀痛言語切為民一洗橫尸血
推鋒陷堅賞萬戶塹山堙谷窮三穴南平舊時頗臣順
欲獻封疆請旌節廟謀猶計病中原豈知一朝更屠滅
天道從來不爭勝功臣好為可喜說交州鷄肋安足貪
漢開九郡勞臣監呂嘉不肯佩銀印徵側持戈敵百男
君不見往年瀕海未郡縣趙佗閉關罷朝獻老翁竊帝
耶自娛白頭抱孫思事漢孝文親遣勞苦書稽首請去
黃屋車得一亡十終不忍太宗之仁千古無

寄耿令幾父過新堂邑作迺幾父舊治之地

呼舩凌大河驅馬踏平沙道旁開新邑千戶有生涯四
衢平且直綠槐蔭縣衙問誰作此邑耆舊對予嗟前日
耿令君遷民出坳窰始遷民懷土異端極紛拏既遷人
氣和草木茂萌芽桃李雖不言春風滿城花陵陂青青
麥煙雨潤桑麻自非耿令君大澤荒蒹葭白頭晏起飯
襁褓語嘔啞自非耿令君漂轉隨魚蝦豈弟民父母不
專司斂賒令君兩男兒有德必世家問令今安在解官

駕柴車當時舞文吏白壁強生瑕令君袖手去不忍試
虎牙人往惜事廢感深知政嘉我聞耆舊語歎息至昏
鴉定知循吏傳來者不能加今為將軍客軒蓋湛光華
幕府省文書醉歸接羅斜懷寶仁者病偷安道之邪勉
哉思愛日贈言同馬槌

放言十首

廢興宜有命得失但自知踽踽衆所忌悠悠誰與歸吾
義苟不存豈更月攘雞風清聞鶴唳想見南山棲

匣中綠綺琴欲撫已絕絃問絃何時絕鍾期謝世年正
聲不可聞千載寂寞間未有顏叔子安知柳下賢

輕肥馬上郎枯槁林下士聲名斲自然勢利焚和氣智
人不駭俗同朝皆用事物外有華胥時時夢中至

蘭楫桂為舟大江可遠游堅車無良馬出門敗吾輶一
身交萬物用我未易周安得柳下惠窮年與之遊

微雲起膚寸大蔭彌九州至仁雖愛物用捨如春秋晴
空不成雨遠岫行歸休何疑陶淵明一去如驚鷗

黃鵠送黃鵠中道言別離送君不憚遠愁見獨歸時羅
網翳稻梁江湖水瀰瀰行行不相見勉哉冥冥飛

蟬聲已紓遲秋日行晚晚長年困道路驅馬方更遠從
事常厭煩歸心自如卷旨甘良未豐安得懷息偃

月滿不踰壘日中為之傾天地尚乃爾萬物能久盈明
德忌睚睚高才貴冥冥忽解扁舟去懷哉張季鷹

榨牀在東壁病起繞壁行新醅浮白蟻渴見解朝醒小
槽垂玉筍音響有餘清疾風春雨作靜夜山泉鳴安得

朱絲絃為我寫此聲想知舜南風正爾可人情

弄水清江曲采薇南山隅當吾無事時此豈不我娛
喬木好鳥音天風韻虛徐遐心遊四海萬里不須臾回首
古衣冠荆樊老丘墟欲付此中意歸翻蟲蠹書短生憂
不足此道樂有餘

送伯氏入都

貧賤難安處別離更增悲經營動北征慈母待春衣短
箠驅瘦馬青草牧口嘶送行不知遠可忍獨歸時太華

物華春街柳轉黃鸝九衢生紫煙到家使人迷知音者
誰子倦客無光輝王侯不可謁秣馬興言歸豈無他人
遊不如我墳箴陳書北窻下此自有餘師

次韻孔四著作北行溥沱

駝褐蒙風霜鷄聲眇墟里青燈進豆粥落月踏冰水平
生不龜藥才可衛十指持比千戶封誰能優劣此

渡河

客行歲晚非遠遊河水無情日夜流去年排堤注東郡

詔使奪河還此州憶昔冬行河梁上飛雪千里曾冰壯
人言河源凍徹天冰底猶聞沸驚浪

次韻寄李六弟濟南郡城橋亭之詩

客心如頭垢日欲撩千篋聞人說江南喜氣吐晴霓伏
枕夢歸路子規吟翠微濟南似江南舊見今不疑洗心
欲成游王事相奪移駑馬戀棧豆豈能辭繫縲本無封
侯骨見事又重遲徒能多著酒大腹如鴟夷唯思一漁
舟載網橫渺瀰矯首歷下亭朱欄轉清溪春風吹桃李

三月自成蹊翠葉張日幄紅英鋪地衣此中有嘉興不
醉定自非況當郡政成野蠶麥兩歧與民同觀游永夜
不闔扉女牆上金樞天如青琉璃想子果下歸馬飽生
芻嘶

和甫得竹數本於周翰喜而作詩和之

初侯一畝宮風雨到臥席前日築短垣昨日始封植平
生歲寒心樂見歲寒色翩翩佳公子為致一窻碧憶公
來相居莖吉龜墨食人言陋如何我自適其適白眼對

俗徒醉帽坐歌側人知愛酒爾不解心得得阿堵絕往
還此君是賓客清風吹月來驩甚齒折屐有節似見聖
無言諒知默數回長者車猶恨地未僻陰雨打葉時曲
肱自宴息心游萬物初何處尋轍迹從來修竹林乃是
逸民國

寄題欽之草堂

河南有伏流經營大行根盛德不終晦發為清濟源公
家濟源上太行正當門修竹帶藩籬百禽鳴朝暾仰視

浮雲作俯窺流水奔相望有盤谷李愿故居存主人國
之老實惟商巖孫班行昔供奉屢進逆耳言天子色為
動羣公聲亦吞肅肅冰霜際不改白玉溫出處士所重
其微難共論公勿懷草堂朝廷待公尊

和答梅子明王揚休點密雲龍

小壁雲龍不入香元豐龍焙承詔作二月嘗新官字盞
游絲不到延春閣去年曾覺減光輝人間十九人未知
外家春官小宗伯分送蓬山裁半壁建安甕枕鷓鴣班

谷簾水與月共色五除試湯飲墨客泛甌銀粟無水脈
辟宮邂逅王廣文初觀團團破龍紋諸公自別淄澠了
兔月葵花不足論石磴春芽風雪落煮澆肺渴初不惡
河伯來觀東海若鹿逢朱雲眞折角子眞雲孫唾成珠
廟堂只今用諸儒鍊成五石補天手上書致身可亨衢
顧我賜茶無骨相他年幸公肯相餉

送劉道純

五松山下古銅官邑居褊小水府寬民安蒲魚少囂訟

簿領未減一邱槃胷中崢嶸書萬卷簸弄日月江湖間
稠人廣衆自神王按劍之眼白相看老身風波諳世味
如食橘柚知甘酸麒麟圖畫偶然耳半枕百年夢邯鄲
平生樽俎宮亭上涉世忘味皆朱顏此時阿翁尚無恙
追琢秀句酬江山堂堂今為蛻蟬去五老偃蹇無往還
大梁城中笏柱頰頽髭今成雪點斑青雲何必出公右
亨衢在天無由攀椎鼓轉舩如病已夢想樓臺落星灣
子正諸兒喜文史阿秤亦聞有筆端丹徒布衣未可量

詩書且對藜藿盤穴中生涯識陰雨木末牖戶知風寒
我今四壁戀微祿知公未能長挂冠

次韻子瞻春菜

北方春蔬嚼冰雪妍暖思采南山蕨韭苗水餅姑置之
苦菜黃鷄羹糝滑蓴絲色紫菰首白蕒蒿牙甜燂頭辣
生菹入湯翻手成芼以薑橙誇縷抹驚雷菌子出萬釘
白鵝截掌鱉解甲琅玕林深未飄籜軟炊香秔煨短茁
萬錢自是宰相事一飯且從吾黨說公如端為苦筍歸

明日青衫誠可脫

六舅以詩來覓銅犀用長句持送舅氏學古之餘

復味禪悅故篇末及之

海牛壓紙寫銀鈎阿雅

師奴僧號

守之索自收長防玩物敗

兒性得歸老成散百憂先生古心冶金鐵堂堂一角誰
能折兒言觥觥持贈誰外家子雲乃翁師不著鼻繩袖
兩手古犀牛兒好看取

次韻子瞻與舒堯文禱雪霧豬泉唱和

老農年饑望人腹想見四溟霖雨足林回投壁負嬰兒
豈聞烹兒翁不哭未論萬戶無炊煙蛛絲蝸涎經杼軸
使君閔雪無肉味煮餅青蒿下鹽菽豈云剪爪宜侵肌
霜不殺草仍故綠幽靈顛負西山霧牲肥酒香神未瀆
得微往從董父餐寧當罪繫葛陂淵卜擇祠官齊博士
暴露致告蒼崖顛請天行澤不汲汲爾亦枯魚過河泣
生鵝斬頸血未乾風馬雲車坐相及百里旌旗灑玉花
使君義動龍蛇蟄老農歡喜有春事呼兒飯牛理蓑笠

博士勿歎從公疲明年麥飯滑流匙

見子瞻粲字韻詩和答三人四返不困而愈崛竒

輒次舊韻寄彭門

公材如洪河灌注天下半風日未嘗撓晝夜聖所歎名
世三十年窮無歌舞玩入宮又見妬徒友飛鳥散一飽
事難諧五車書作伴風雨暗樓臺鷄鳴自昏旦雖非錦
繡贈欲報青玉案文似離騷經詩窺關雎亂賤生恨學
晚曾未奉巾盥昨蒙雙鯉魚遠託鄭人緩風義薄秋天

神明還舊貫更磨薦襴墨推挽起疲懦忽忽未嗣音微
陽歸候炭仁風從東來拭目望齋館鳥聲日日春柳色
弄晴暖漫有酒盈樽何因見此粲

人生等尺捶豈耐日取半誰能如秋蟲長夜向壁歎朝
四與暮三適為狙公玩臭腐斲神竒喑噫即飄散我觀
萬世中獨立無介伴小黠而大癡夜氣不及旦低首甘
養尻雕登俎案所以終日飲醉眠朱碧亂無人明此
心忍垢待濯盥仰看東飛雲只使衣帶緩先生古人學

百氏一以貫見義勇必為少作衰俗懦忠言願回天不
忍數吞炭還從股肱郡待詔圖書館投壺得賜金侏儒
餘飽暖寧令東方公但索長安漿

元龍湖海士毀譽略相半下牀臥許君上牀自永歎丈
夫屬有念人物非所玩坐令結歡客花為煙霧散武功
有大略亦復寡朋伴詠歌思見之長夜鳴鶡旦東南望
彭門官道平如案簡書束縛人一水不能亂斯文媿秬
鬯可用圭瓚盥誠求活國醫何忍棄和緩開疆日百里

都內錢朽貫銘功甚俊偉迺見儒生懦且當置是事勿
使冰作炭上帝羣玉府道家蓬萊館曲肱夏簟寒灸背
冬屋暖只令文字垂萬世星斗粲

次韻答堯民

君開蘇公詩疾讀思過半譬如聞韶耳三月忘味嘆我
詩豈其朋組麗等俳玩不聞南風絃同調廣陵散鶴鳴
九天上肯作家鷄伴晁子但愛我品藻私月旦官閒樂
相從梨栗供杯案門靜鳥雀嬉花深蜂蝶亂忽蒙加禮

貌齋戒事撝盥問大心更小意督辭反緩君材於用多
舞選弓矢貫聰明回自照勝己果非懦我如相繪事素
質施朽炭古來得道人非獨大庭館晁子已不疑冬寒
春自暖繫表知藥言擇友得荀粲

再和寄子瞻聞得湖州

天下無相知得一已當半桃僵李為仆芝蕙增歎佳
人在江湖照影自娛玩一朝入漢宮掃除備冗散何如
終流落長作朝雲伴相思欲面論坐起難五旦身慚尸

廩祿有罪未見案公又雄萬夫皦皦不自亂臧穀皆亡
羊要以道湔盥傳聲向東南王事不可緩春波下數州
快若七札貫椎鼓張風帆相見激衰懦空文不傳心千
古付煨炭安得垂天雲飛就吳興館魚饜柳絮肥筍蕈
溪沙暖解歌使君詞樽前有三粲

用明發不寐有懷二人為韻寄李秉彝德叟

竹貫四時清

一作竹節
晚逾綠

月通雲氣明

一作月華
寒更明

外弟有

佳質

一作處

妙年推老成後凋對霜雪

一作到
冰霜

不昧處陰

晴盛德當如此

一作觀物
憶相見

古人畏後生

一作契闊
難為情

在昔授子書髡彼垂兩髮乖離今十年樹立映先達清

燈哦妙

一作
誦佳

句如酌春酒滑把書念攜手惆悵至明發

人生不如意十事恒八九未見歷下人徒傾歷城酒從
來親骨肉不免相可不但願崇事實虛名等箕斗

蚤知鵲山亭李杜發佳思彌年聽傳誇登覽通夢寐遙
憐坐清曠落筆富新製尚因賓客集漉酒使我醉

往在舅氏旁獲拚堂上帚六經觀聖人明如夜占斗索

居廢舊聞獨學無新有羨子杞桂材未曾離矯揉

安詩無恙時學行超輩儕華屋落丘山百憂滿人懷此

士如不亡仲子

一作叔也

抱奇材不獨典刑在神明還觀來

少時

一作年

誦詩書貫穿數萬字爾來窺陳編記一忘三

二光陰如可玩老境翻手至良醫曾折足說病迺真意
桃李春成徑本自不期人歷下兩寒士簞瓢能悅親恥
蒙伐國問肯臥覆車塵子既得此友從之求日新

賦未見君子憂心靡樂八韻寄李師載

同陞吏部曹往在紀丁未別離感寒暑歲星行十二我
慚雞蓋穀子歎天且剗空餘山梁期尚不昧初志

會合良難期繫匏各異縣千里共明月如披故人面浮
雲蔽高秋此豈中心願霧重豹成文水清魚自見

齊地穀翔貴排門無爨饋二仲有甘旨奉親亦良勤原
田水洗洗何時稼如雲無民願豐歲政自不忘君

古人有成言歲暮於君子斧揮郢人鼻琴即鍾期耳新
詩凌建安高論到正始徒言參隔辰未負石投水

白雪非衆聽夜光忌暗投古來不識察浪自生百憂三
月楚國淚千年郢中樓無因杭一葦濁水拍天流
河南李茂彥內蘊邁俗心濬沖有涇渭一顧重千金事
親知色難勝已又勇沉外物既難必求之首陽岑
飄風從東來雨足盡西靡萬物逐波流金石終自止渭
因涇使濁非以葑故毀智所無奈何誰能為樗里
紛紛車馬客如集市人博彼雖有求來我但使一噓忽
逢媚學子時亦撼關鑰何當攜手期濠上得魚樂

以同心之言其臭如蘭為韻寄李子先

往日三語掾解道將毋同我觀李校書超邁有古風談
道屢入微閉門長蒿蓬誰能賞遠韻太守似安豐

流水鳴無意白雲出無心水得平淡處渺渺不厭深雲
行不能雨還歸碧山岑斯人似雲水廊廟等山林

俗士得失重舍龜觀孕頤六經成市道駟僧以為師吾
學淡如水載行欲安之惟有無心子白雲相與期

摧藏褫冕冠寂寞歸丘園一瓢俱好學伯仲吹簫壎政

以此易彼高車宅朱門得失固有在難為俗人言

攜手日不足七年坐乖離愁思不能眠起視夜何其殘
月掛破鏡寒星滿天垂明明故人心維斗終不移

窮閭蒿蔓羶富屋酒肉臭酒肉令人肥蒿蔓令人瘦欲
從鍾鼎食復恐憂患構秦時千戶侯寂寞種瓜後

客從濟南來遺我故人書墨淡字疎行故人情有餘上

言猶健否次問意何如只今意何有思食故溪魚

意一作思

吾子有嘉德譬如含薰蘭清風不來過歲晚蒿艾間古

來百夫雄白首在澗槃非關自取重直為知人難

次韻晁元忠西歸十首

我田失耕耘歲暮拾枯萁

一作採
蕨薇

枯萁

一作
蕨薇

不可食日

晏抱長飢猛虎依山林眼有百步威一從梁鵞食風月
何時歸

聖莫如東家長年困行路公養為淹留豈不以食故林
薄鳥遷巢水寒魚不聚孤士似無家轉蓬何由住

前有熊羆咆後有虎豹號已出澗谷底更陟山阪高五

日一併食十年一緼袍未知歸宿處豈憚鞍馬勞

麗姬封人子弄影愛朝日晉國始得之涕泣甘首疾憂
危與安樂一生誰能必同牀食芻豢迺悔沾襟失

怨句識之推商歌知甯戚我占晁氏賢乃在賦行役同
游羿彀中儻免非爾力滔滔今如此去邦將安適

熱避惡木陰渴辭盜泉水曾回勝母車不落抱玉淚晁

氏猛虎行皦皦壯士意人生高唐觀有情何能已

晁詩云安


得龍山潮駕回實河水水
從樓前來中有美人淚

腰垂九井璜耳著明月璫蘭蓀結襟帶芰荷製衣裳其
人雖甚遠其室大道傍當身不著意千載永相望

風雨去家行手龜面黧黑屠龍非世資學問求自得我
思脊令詩同飛復同息兄弟無相遠急難要羽翼

人言貧在家殊勝富作客雞棲牛羊下君子亦安息千
里求明師營糧從事役學問非物外室虛生純白

開田望食麥春隴無秀色深耕不償勤牛耳徒濕濕豐
凶誰主張坐令愁煎迫河清會有時得酒灑胃臆



山谷外集卷二

欽定四庫全書

集部

山谷外集卷三

四

詳校官庶吉士臣胡鉅

檢討臣何思鈞覆勘

總校官進士臣朱鈐

校對官修撰臣戴衢亨

謄錄監生臣趙果

欽定四庫全書

山谷外集卷三

宋 黃庭堅 撰

古詩六十六首

答王道濟寺丞觀許道寧山水圖

往逢醉許在長安
蠻溪大硯磨松煙
忽呼絹素翻硯水
久不下筆或經年
異時踏門闢白首
巾冠欹斜更索酒
舉杯意氣欲翻盆
倒臥虛樽將八九
醉拈枯筆墨淋浪

勢若山崩不停手數尺江山萬里遙滿堂風物冷蕭蕭
山僧歸寺童子後漁伯欲渡行人招先君笑指溪上宅
鷓鴣白鷺如相識許生再拜謝不能元是天機非筆力
自言年少眼明時手揮八幅錦江絲贈行卷送張京兆
心知李成是我師張公身逐銘旌去流落不知今主誰
大梁畫肆閱水墨我君槃礴忘揖客蛛絲煤尾意昏昏
幾年風動人家壁雨雪泔泔滿寺庭四圍冷落讓丹青
笑酬肆翁十萬錢卷付騎奴市盡傾王丞來觀皆失席

指點如見初畫日四時風物入句圖信知君家有摩詰
我持此圖二十年眼見綠髮皆華顛許生縮手入黃泉
衆史弄筆摩青天君家枯松出老瞿風煙枯枝倚崩石
蠹穿風物君愛惜不誣方將有人識

過家

絡緯聲轉急田車寒不運兒時手種柳上與雲雨近舍
旁舊傭保少換老欲盡宰木鬱蒼蒼田園變畦畛招延
屈父黨勞問走婚親歸來翻作客顧影良自哂一生萍

託水萬事雪侵鬢夜闌風隕霜乾葉落成陣燈花何故
喜大是報書信親年當喜懼兒齒欲毀齒繫船三百里
去夢無一寸

上冢

自公返蓬蓽稅駕上丘壟霜露此日悲松楸十年拱養
鵷數毛羽初不及承奉康州斷腸猿風枝割永痛

一作風樹

終日痛

少年不如人登仕無前勇髮疎齒牙搖鯨波怒號

洵願為保家子敢議世輕重稱觴太夫人魚菜贍庖

供

明叔知縣和示過家上冢二篇輒復初韻

敝邑荷佳政耕桑及時運令君平生歡遠別喜親近吾
友徐光祿死戰萬事盡不見東陵侯唯見瓜連畛且當
置是事椎牛會賓親百年共如此破涕作嘲哂枯荷野
塘水照影驚顏鬢功名黃梁炊成敗白蟻陣少時無老
境身到乃盡信此來見抱子別日多未齒夜闌如夢寐
寒燭泣餘寸

女蘿上杉松野葛蔓畦壟蛛絲網祠屋芝菌生晝拱去
國二十年雪涕夙嚴奉更歷飽艱難抑搔知痒痛聞道
下士笑轉物大人勇平生隨風波歸來夢猶洵持此寸
草心負荷九鼎重柔嘉無牛羊保身以為供

次韻叔父聖謨詠鷺遷谷

鴉舅頗強聒僕姑常勃磈黃鳥懷好音秋菊染春衣
嚶求朋友憂患同一枝提壺要酤我杜宇賦式微黃鳥
在幽谷韜光養羽儀晴風曜桃李言語自知時先生丘

中隱喬木見雄雌引子遷綠陰相戒防禍機李杜死刀
鋸陳張怨棄遺不如聽黃鳥永晝客爭棋

詠清水巖呈郭明叔序

清水巖號為天下勝處去縣庭才二十里一山空洞
如覆青玉盎也寒泉在其間甚壯急至巖口伏流入
石鼻中巖下有石鐘鼓磬其聲清越宏敞袞袞跑跑
能警動人世間金革聲亦不足道也巖前平行略可
坐千人不審旌旆嘗因公事一游否

嘗聞清水巖空洞極明好虎狼僊部曲鐘鼓天擊考雲
生臥龍石水入鍊丹竈有意攜管絃山祇應洒掃

次韻清水巖

西安封域中清水巖泉好金堂茂芝朮仙史書勲考桃
源人已往千古遺井竈雙鳧能來游俗子跡可掃

次韻章禹直開元寺觀畫壁兼簡李德素

丹青古藏壁風雨飽侵食拂塵開藻鑒志士淚霑臆靈
山遠飛來不可以智測龍神湛回向擁衛立劒戟依稀

吳生手旌旆略可識鴻濛插樓殿毫髮數動植廣牀瞻
二聖有衆拱萬億飛行湊六合攬取著一席人人開生
面絕妙推心得李侯天機深指點目所及三生石上夢
天樂鳴我側幽尋前日事晦明忽復易章生南溟鵬籠
檻鎖六翮能同寂寞遊濁酒聊放適西風葉蕭蕭蟋蟀
依牆壁家無萬金產四鄰碓聲急藜羹傲鼎食藍縷亦
山立並船有歌姝粉白眉黛黑期公開顏笑醉語雜翰
墨不須談俗事祇令人氣塞

聽崇德君鼓琴

月明江靜寂寥中
大家斂袂撫孤桐
古人已矣古樂府
髣髴雅頌之遺風
妙手不易得善聽良
獨難猶如優曇
華時一出世間兩
忘琴意與已意迺
似不著十指彈禪
心默默三淵靜幽
谷清風淡相應絲
聲誰道不如竹我
已忘言得真性罷
琴窻外月沉江萬
籟俱空七絃定

次韻答楊子聞見贈

金盤厭飫五侯鯖
玉壺澆潑卽官清
長安市上醉不起

左右明粧奪目精結交賢豪多杜陵桃李成蹊臥落英

黃綬今為白下令

太和縣古白下

蒼顏只使故人驚督郵小吏

皆趨板陽春白雪分吞聲楊君青雲貴公子歎嗟簿領
困書生贈我新詩甚高妙淚斑枯笛月邊橫文章不直
一杯水老矣忍與時人爭江城歌舞聊得醉但願數有
美酒傾莫要朱金纏縛我陸沉世上貴無名

食笋十韻

洛下斑竹笋花時壓鮭菜一束酬千金掉頭不肯賣我

來白下聚此族富庖宰蠶粟戴地翻穀腴觸牆壤穢穢
入中廚如償食竹債甘藟和菌耳辛膳肺薑芥烹鵝雞
股掌炮鱉亂帚介小兒哇不美鼠壤有餘噉可貴生於
少古來食共噫尚想高將軍五溪無人采

蕭巽葛敏修二學子和予食筍詩次韻答之

北饌厭羊酪南庖豐笋菜自北初落南幾為兒所賣習
知價廉平百態事烹宰鹽晞枯腊瘦蜜漬真味壤就根
煨茁美豈念炮烙債咀吞千畝餘曾次不薑芥二妙各

能詩才名動江介詩論多佳句膾炙甘我囁因君思養

竹萬籟聽秋噫從此繕藩籬下令禁漁采

一作下書
示漁采

韭黃照春盤菰白媚秋菜惟此蒼竹苗市上三時賣江
南家家竹翦伐誰主宰半以苦見疎不言甘易壞葛陂
雕龍睡未索兒孫債獺膽能分杯虎魄妙拾芥此物於
食穀如客得儔介思入帝鼎烹忍遭飢涎噉懶林供翰
墨礎杵風號噫每下歎枯株焚如落樵采

胡朝請見和食笋詩輒復次韻

人笑庾郎貧滿胸飯寒菜春盤食指動笋茁入市賣回
首萬錢廚不羨廊廟宰民生暫神竒胞雋伐性壞忍持
芭蕉身多負牛羊債籜龍不稱寬易致等十芥蕭蕭煙
雨姿壯士持戈介駢頭沸鼎烹可口垂涎噉霜叢負後
凋玉食香餘噫讀詩無全功葑菲儻可采

寄李次翁

雨斷山川明花深鳥鳥樂枯骨不霑名古今同一壑唯
有在世時聊厚不為薄南箕與北斗親友多離索斯文

如舊歡李侯極磊落頗似元魯山用心撫疲弱不以民
為梯俯仰無所作胸中種妙覺歲晚期必獲然膏夜讀
書見聖宜有作文字寄我來官郵遠飛橐世緣心已死
儻得萬金藥

題高君正適軒

至靜在平氣至神惟順心道非貴與賤達者古猶今功
名屬廊廟閒暇歸山林畜魚觀羣嬉籠鳥聽好音不如
一丘壑隨願得飛沉開門納日月呼客解纓簪詩書撫

塵迹歌舞送光陰妖嬈傾國笑絲竹感人深豁然開
曾次風至獨披襟樊籠鎖形質物外有幽尋

奉送周元翁鎖吉州司法廳赴禮部試

江南江北木葉黃五湖歸鴈天雨霜繫船湓城秣高馬
客子結束女縫裳貢書登名徹未央不比長卿薄遊梁
南山霧豹出文章去取公卿易驅羊與君初無一日雅
傾蓋許子如班揚囚拘官曹少相見忽忽歲晚稼滌場
一盃僚友喜多在謝守不見空澄江澄江如練明橘柚

萬峯相倚摩青蒼暮堂醺醺客被酒艷歌聒醉燭生光
椎鼓發船星斗白明日各在天一方寒鴟滿枝二喬宅
樽前顧曲憶周郎鱸魚斫膾蔗為漿恨君不留誰與嘗
殿前春風君射策漢庭諸公必動色故人若問黃初平
將作金華牧羊客

寄晁元忠十首

國工裁白璧巧冶鑄干將成為萬乘器貫日吐寒光其
誰湔拂汝歲月海生桑蛛網連城玉苔生百鍊剛

子雲賦逐貧退之文送窮二作雖類俳頗見壯士胸臆
子行問津欲濟無山窮著書蓬蒿底端有古人風

沙擁大江水泥封函谷關古來世上雄宰木風雨寒魯
儒守一經亦有澗谷繁何事窮愁極江南庾子山

河清無人待蘭芳無人采山空露團團葛蔓石磊磊世
有傾國媒一笑珠百琲往時禰處士顛倒孔北海

楚宮細腰死長安眉半額比來翰墨場爛熳多此色文
章本心術萬古無轍迹吾嘗期斯人隱若一敵國

北書來無期鴈不到梅嶺欲遺雙鯉魚楓葉江路永平
生中心願褊短不獲騁富貴安可為吾亦有岑鼎
濟岱有佳人肌膚若冰雪我願從之遊補我黥與劓了
不解人嗔真成一癡絕標社定頽然聊用神吾拙
山公懷涇渭濬冲遭鑒賞代豈無若人吹噓青雲上念
君如濟水抱清伏泉壤行潦酌尊彝吾猶恃源往
蛾眉在蒿萊金玉千里音遙思甌生塵汗漫觀古今沉
冥驚人句摹寫詠時禽無為愁肝腎君子要刳心

臨川往長懷神交可心晤文章不經世風期南山霧化
蟲蛾四時悲喜各有故吾獨無間然子規勸歸去

次韻周法曹游青原山寺

市聲故在耳一原謝塵埃乳竇響鐘磬翠峯麗昭回俯
看行磨蟻車馬度城隈水猶曹溪味山自思公開浮圖
躋金碧廣廈構瓊材蟬蛻三百年至今猿鳥哀禪印平
如水偈句非險崖心花照十方初不落梯堦我行暝託
宿夜雨滴華櫬殘僧四五輩法筵歎塵埋石頭麟一角

道價直九垓廬陵米貴賤傳與後人猜曉躋上方上秋
膝亂葦荻寒藤上老木龍蛇委筋骸魯公大字石筆勢
欲崩摧德人曩來游頗有嘉客陪憶當擁旌旗千騎相
排颺且復歌舞隨絲竹寫煩哇事如飛鴻去名與南斗
偕松竹吟高丘何時更能來回首翠微合于役王事催
猿鶴一日雅重來尚徘徊

碑本荻字韻下有兩句云
蓮子委箭鏃葵花及金杯

答永新宗令寄石耳

飢欲食首山薇渴欲飲潁川水嘉禾令尹清如冰寄我

南山石上耳筠籠動浮煙雨姿淪湯磨沙光陸離竹萌
粉餌相發揮芥薑作辛和味宜公庭退食飽下筯杞菊
避席遺萍蘆鴈門天花不復憶况乃桑鵝與楮雞小人
藜羹亦易足嘉蔬遣餉荷眷私吾聞石耳之生常在蒼
崖之絕壁苔衣石腴風日炙捫蘿挽葛採萬仞足委
骨豺虎宅佩刀買犢劒買牛作民父母今得職閔仲叔
不以口腹累安邑我其敢用鮭菜煩嘉禾願公不復甘
此鼎免使射利登嵯峨

喜知命弟自青原歸

為吏困米鹽曲肱夢靈泉諒非調鼎手正覺荷鋤便在
公雖勤苦歸喜為山禪去我忽數日草蟲傍牀煎屋角
烏烏樂行與響擔肩包解分柿栗兒女開樽前白紵繞
祖塔香攜青原煙玄珠一百八夜紉湘縷穿高林風落
子老僧選霜堅袖中出新詩山水含碧鮮五言吾老矣
佳句付惠連

寄張宜父

建德之國有佳人明珠為佩玉為衣去國三歲阻音徽
所種桃李民愛之射陽城邊春爛熳柳暗學宮鳥相喚
追隨裘馬多少年獨忍長飢把書卷讀書萬卷不直錢
一作筆逐貧不去與忘年一作交親虎豹文章被禽縛何如
有神達生自娛樂

高至言築亭於家園以奉親總其觀覽之富命曰
溪亭乞余賦詩余先君之敝廬望高子所築不
過十牛鳴爾故余未常登臨而得其勝處

逸人生長在林泉更築亭臯名意怪明月清風共一家
全以山川為眼界鳥度雲行閱古今溪濱木末聽竽籟
老夫平生行樂處只今一作許公分一派

彫陂

彫陂之水清且泚屈為印文三百里呼船載過七十餘
褰裳亂流初不記竹輿嘔啞山徑涼僕姑呼婦聲相倚
篁中猶道泥滑滑僕夫慘慘耕夫喜窮山為吏如漫郎
安能為人作嚆矢老僧迎謁喜我來吾以王事篤行李

知民虛實應縣官我寧信目不信耳僧言生長八十餘
縣令未曾身到此

幾復寄檳榔且答詩勸予同種復次韻寄之

少來不食蟻丘漿老去得意漆園方鑑中已失兒時面
忍能乞與兵作郎

元翁坐中見次元寄到和孔四飲王夔玉家長韻

因次韻率元翁同作寄湓城

雨罷山澤明日長花柳困游絲上天衢觀物得無悶時

從顧曲人筭饌酌春醞季子未識面想見眉目俊新詩
如鳴絃快讀開鄙吝銅官魯諸生事道三無愠比來工
五字句法妙何遜枯槁覆吳圖青簡玩秦燼葉暗黃鳥
時風號報花信遙仰吟思苦江錦割向盡應煩王公子
又破黃封印

次孔四韻寄懷元翁兄弟并致問毅甫

書帙蠹魚乾爐香眠鴨困佳人來無期詩句耳排悶遙
知烏衣游碁局具肴醞爭道嘲不恭鑒兵勞得俊頗尋

文獻盟不落市井吝四月明朱夏南風解人愠風前懷
二陸家法窺抗遜身有三尺桐爨下得餘燼端可張洞
庭寥闊世未信為我謝孔君舉酒取快盡世故安足存
青天飛鳥印

三月乙巳來賦鹽萬歲鄉且菟獮匿賦之家晏飯
此舍遂留宿是日大風自採菊苗薦湯餅二首
飛廉決雲開白日頓撼天地萬竅號按莎桃李欲淨盡
乞與游絲百尺高

幽叢秀色可攬擷煮餅菊苗深注湯飲冰食蘗浪自古
摩挲滿懷春草香

四月戊申賦鹽萬歲山中仰懷外舅謝師厚

只今漢龐公白髮佐州郡窮通視寒暑仕已誰喜愠長
松臥澗底桴雷多裂壘未須論才難世人無此韻禪悅
稱性深語端入理近渙若開春冰超然聽年運臨民秉
三尺朱墨不可紊傳聞但言歸心許手自隱欲知南陂
稻得幾就收据胥疏江湖濱不邇金玉訓濡需且肉食

轂鯨恐鐘鑿龍移山發洪虎乳月生暈竹聲寒夏簟輟
寢中夜聽寄聲向鹿門儻賜勞苦問

上權郡孫承議

公家簿領如鷄棲私家田園無置錐眞成忍罵加食飯
不如江西之水可樂飢他人勤拙猶相補身無功狀堪
上府公誠遣騎束縛歸長隨白鷗臥煙雨

寄懷元翁

歲年豐稻秔井邑盛煙火北園曾未窺王事方勤我花

枝互低昂鳥語相許可觀物見歸根撫時終宴坐搔首
望四鄰諸賢皆最課極工簿領書甚辦米鹽顆平生短
朱墨吏考仰丞佐初無公侯心骨相本寒餓明窻懷玉
友清絕吟楚些念君方坐曹無因奉虛左

對酒次前韻寄懷元翁

花光漸寒食木燧催國火沽酒鳥勸人懷賢吾忘我事
往墮甌休心知求田可人不在眼樽俎思促坐有生
常倥傯無暇天所課不解聞健飲我成一蓬顆泥鈞埏

萬物寒暑勤五佐豈其懷愛憎私使我窮餓醉魂招不
來浪下巫陽此夢成少年嬉走馬章臺左

奉答茂衡惠紙長句

陽山老藤截玉肪烏田翠竹避寒光羅侯包贈室生白
明於機上之流黃愧無征南蠆尾手為寫黃門急就章
羅侯相見無雜語苦問為山有無句春草肥牛脫鼻繩
菰蒲野鴨還飛去故將藤面乞伽佗願草驚蛇起風雨
長詩說紙落秋河要知溪工下手處却將冰幅展似君

震旦花開第一祖

烏田一作烏孫

雜言贈羅茂衡

嗟來茂衡學道如登欲與天地為友欲與日月並行萬
物崢嶸本由心生去子之取舍與愛憎惟人自縛非天
黥墮子筋骨堂堂法窟九丘四溟同一眼睛不改五官
之用而透聲色常為萬物之宰而無死生念子坐幽室
爐香思青冥是謂蟄蟲欲作吾驚之以雷霆

長句謝陳適用惠送吳南雄所贈紙

廬陵政事無全牛恐是漢時陳太丘書記姓名不肯學
得紙無異夏得裘琢詩包紙送贈我自狀明月非暗投
詩句縱橫剪宮錦惜無阿買書銀鈎蠻溪切藤卷盈百
側釐羞滑蠶羞白想當鳴杵砧面平桺柳葉風溪水碧
千里鵝毛意不輕瘴衣腥膩北歸客君侯謙虛不自供
胡不贈世文章伯一涔之水容牛蹄識字有數我自知
小時雙鉤學楷法至今兒子憎家雞雖然嘉惠敢虛辱
煮泥續尾成大軸寫心與君心莫傳平生落魄不問天

樽前花底幸好戲為君絕筆謝風煙已無商頌猗那手
請續南華內外篇

次韻吉老遊青原將歸

欣欣林臯樂賞心天際翔清樽膾魴鯉朱果實圓方醉
罷聽疎雨衾寒夢國香雨餘山吐月的皦滿簾霜展轉
復展轉鍾魚曉琅琅思歸笑迎門兒女扶相將

次韻知命永和道中

靈骨閔金鑠梵宮超玉繩道人往香火獨先開靜行呼

船久無人月沉河漢傾虛舟不受怒故在蓼灘橫

飲潤父家

齋閣寒麝薰書帙映斜景偶來樽俎同延此笑言頃宮
線添尺餘朝來日未永一醉解語花萬事盡地餅要似
虎頭癡何須樗里癆

次前韻寄潤父

昏昏迷簿領匆匆貴尋景嘗盡身百憂訖無田二頃喜
從吾宗遊九里河潤永呼兒跪酒樽戒婦饌湯餅老夫

何取焉君悅甕盎瘳

送酒與周法曹用贈潤父韻

遙知謝法曹詩句多夏景聞道學書勤墨池方一頃大字甚未道小字逼智永我有何郎樽清江醞玉餅還書及斗數與君酌楠瘳

癸丑宿早禾渡僧舍

城頭渡可涉早禾渡可輟試問安用舟春水三丈餘是維一都會駟僮權征輸鬱鬱多大姓儒冠頗詩書以武

斷鄉曲舊俗小未除厭罵謝近市斬絕得僧區此地美
水竹林明見浴鳧相追噉菱藻天樂非世娛憶在田園
日放浪友禽魚今來長山邑忍飽撫惇孤出入部曲隨
咳唾吏史趨形骸束簪笏可意一事無謀生理未拙仰
愧擁腫樗曲肱晴簷底結網看蜘蛛

宿觀山

暮發白下地暝投觀山宿橫溪赤欄橋一徑入松竹野
僧如驚麇避堂具燈燭我眠興視夜部曲始炊熟覓水

煙際鳴萬籟入秋木平生瀟洒興本願終澗谷世累漸
逼人如垢不澣沐已成老翁焉作吏長碌碌

上大蒙籠

乙卯
晨起

黃霧冥冥小石門苔衣草路無人迹苦竹參天大石門
虎迹兔蹊聊倚息陰風搜林山鬼嘯千丈寒藤繞崩石
清風源裏有人家牛羊在山亦桑麻向來陸梁嫚官府
試一作呼使前問其故衣冠漢儀民父子吏曹擾之至
如此窮鄉有米無食鹽今日有田無米食但願官清不

愛錢長養兒孫聽驅使

勞坑入前城

乙卯
飯後

刀坑石如刀勞坑人馬勞窈窕篁竹陰是常主逋逃白
狐跳梁去豪猪森怒嗥雲黃覺日瘦木落知風饕輕軒
息源口飯羹煮溪毛山農驚長吏出拜家騷騷借問淡
食民祖孫甘舖糟賴官得鹽喫政苦無錢刀

乙卯宿清泉寺

稅輿陟高岡却立倚天壁就興亂清溪轉石飛霹靂十

步一沮洳五步一枳棘上方未言返豁見平土宅田家
鷄犬歸佛廟檀藥碧蓮蕩落紅衣泉泓數白石人如安
巢鳥稍就一枝息鐘魚各知時吾亦自得力

丙辰仍宿清泉寺

山農居負山呼集來苦遲既來授政役謠詠謂余欺按
省其家資可忍鞭撻之恩言輸公家疑阻久迺隨滕口
終自愧吾敢乏王師官寧憚淹留職在拊惇嫠所將部
曲多溷汝父老為西山失半壁且復下囊輜啼鴉散篇

帙休吏稅巾衣石泉鼓坎坎竹風吹參差書牋行熠燿
壁蟲催杼機昏缸夜未央高枕夢登巖

丁巳宿寶石寺

鐘磬秋山靜爐香沉水寒晴風蕩濛雨雲物尚盤桓淪
茗赤銅碗覓泉蒼煙竿紅榴罇玉房么橘委金丸枕簟
已思燠飯羹可加食觀已自得力談玄舌本乾理窟乃
塊然世故浪萬端牛刀經肯綮古人貴守官摩挲發硃
手考此一丘槃

已未過太湖僧寺得宗汝為書寄山蘋白酒長韻

詩寄答

從學晚聞道謀官無見功
早衰觀水鑒內熱愧鄰邦
北鄰有宗侯治劇乃雍容
摩手撫鰥寡藁礫強梁桃李
與荆棘稱物施露霜政經甚
纘密私不蚍蜉通吏舍無
請賕家有侯在堂府符下鹽
策縣官勸和羹作民敏風
雨令先諸邑行我居萬夫上
闢情世無雙此邑宅巖巖
里中頗秦風翁媪無恙時
出分如蜂房一錢氣不直白

挺及父兄簪筆懷三尺揖我謂我臧向來豪傑吏治之
以牛羊我不忍敝民教養如兒甥荆雞伏鵠卵久望羽
翼成訟端洶洶來諭去稍聽從尚餘租庸調歲歲稽法
程按圖索家資四壁達牖窻揜目鞭朴之桁楊相推棖
身欲免官去駕馬戀豆糠所以積廩鹽未使戶得烹八
月醺社酒公私樂年登遣徒與會計而悉走荻簞吾惟
不足遣夙駕略我疆邑西軼戾地是嘗嬰吾鋒齟齬其
強宗彼乃可使得令夙夜于遠郊草露沾帷裳入磴履虎

尾捫蘿觸蔓芒借問夕何宿煙邊數峯橫松竹不見天
蟠空作秋聲谷鳥與溪瀨合絃琵琶箏稅駕亂石間巖
寺鳴疎鐘山農頗來服見其父孫翁苦辭王賦遲戶戶

無積藏民病我亦病呻吟達五更韻為誦書語

一作書空語

行歌類楚狂舉鞭問嘉禾秣馬可及城惜哉憂城旦不
得對榻牀灑筆付飛鳥北風吹報章書回銀鈎壯句與
麝煤香浮蛆撥官醅傾壺嫩鵝黃山氣常翕翕此物可
屢觴預藥割紫藤開籠喜手封味溫頗宜人笔以石飴

薑舉盃引藥糜詠詩對寒江寄聲甚勞苦相思秋月明
我邑萬戶鄉其民資囂凶欲割以壽公使之承化光反
以來壽我中有吞舟鯨銅墨俱王命職思慰孤惇何時
賭一擲燒燭呪明瓊

庚申宿觀音院

谷底一墟落地形如盎盆棖題相照耀其民頗家溫土
風甚於秦不可借釜甌音僧屋無陶瓦剪茅蒼竹樊借
問僧安在乞飯走諸門人關鳥鳥語簟涼風水旁有

蜂蜜廬頗聞衙集喧將雨蟻爭丘廩兵復追奔紅英委
鳳翼赤憤我雞冠汲烹寒泉窟伐燭古松根相戒莫浪
出月黑虎夔藩

辛酉憩刀坑口

羣山黛新染蒙氣寒鬱鬱掃除迎將家下簞脫巾鞵南
北舍小棠况可清煩暘鳥聲廢晝眠聊以休吏卒竹雞
苦喚人覺坐觀法窟無外同一家惟已非萬物清波兩
鴛鴦善游且能沒驚人相追飛甚念失其匹春鉏貌閒

暇羨魚情至骨廣道策堅良熙熙集於苑爛額始論功
儻能謀曲突

金刀坑迎將家待追漿坑十餘戶山農不至因題
其壁

窮鄉阻地險篁竹嘯夔魑惡少擅三窟不承吏追呼老
翁燕無凶偃蹇坐里閤後生集聞見官不禁權輿懷書
斥長吏持杖麀公徒遂令五百里化為豺豕墟古來沉
牛羊撒水臣鱷魚猛虎剝文章矧而民髮膚哀哉奉其

身曾不如鳥鳥破家縣令手南面天子除要能伐強梁
然後活惇孤屬為民父母未教忍先誅山川甚秀拔人
物亦詩書十室有忠信此鄉何獨無

江西泊舟後作

太和小舫板上
塵土中得此詩

江水冥冥沙石陰一舸行盡春已深浪花綠蔓曳錦帶
短蘆刺水抽玉簪飢魚未沉波面筒小舫正橫溪上風
清輝濯淨遠山碧白鳥飛入蒼煙叢

追憶予泊舟西江事次韻

老大無機如漢陰白鳥不去相知深往事刻舟求墜劍

懷人揮淚著

直略反

亡簪城南鼓罷吹畫筒城北歸帆落

晚風人煙犬吠西山麓鬼火狐鳴春竹叢

以十扇送徐天隱

人貧鵝鴈眊隣牆公貧琢詩聲繞梁坐客有甌吾不愛
暑榻無扇公自涼黨錮諸君尊孺子建安七人先偉長
遣奴送簟非為好恐有佳客或升堂

聞致政胡朝請多藏書以詩借書目

萬事不理問伯始藉甚聲名南郡胡遠孫白頭坐郎省
乞身歸來猶好書手抄萬卷未閣筆心醉六經還荷鉏
願公借我藏書目時送一鴈開鰈魚

次韻郭明叔長歌

君不見懸車劉屯田騎牛澗壑弄潺湲八十唇紅眼點
漆金鐘舉酒不留殘君不見征西徐尚書為國捐軀矢
石間龍章鳳姿委秋草天馬長辭十二閑何如高陽酈
生醉落魄長揖輟洗驚龍顏丈夫當年傾意氣安用蚓

食而蝸跼古人已作泉下土風義可想猶班班郭侯忠
信如古人薦書飛名上九關詩書自可老斲輪智略足
以解連環銅章屈宰山水縣友聲想求不我頑鵬翼垂
天公直起燕巢見社身思還文思舜禹開言路即看承
詔著豸冠尚趨手板事直指少忍吏道之多艱黃花零
落一樽酒別有天地非人寰

山谷外集卷三

欽定四庫全書

山谷外集卷四

宋 黃庭堅 撰

古詩七十六首

和答魏道輔寄懷十首

堂堂陽元公人物妙晉東魏侯多能事髣髴見家風長
魚無波濤坐與蝦蟇同諸山搖落盡旅食歲時窮

平生弄翰墨纂事半九州天末逢故人園蔬當肴羞酒

闌豪氣在尚欲椎肥牛虞卿不窮愁後世無春秋

雷行萬物春天震而地撼閉塞成冬冰楚越自肝膽貂
狐諒柔溫藜藿自羹糝相思牛羊下城鼓寒統統

劍埋豐城獄氣與斗牛平皇明燭九幽滌拔用神兵誰
言黃沙磧矢盡鼓不鳴至今門下士落涕為荆卿

別時燕辭屋草黃秋半分今來冬日至稍添刺繡文百
年幾會合美酒不屢醺犀牛可乞角窮士難薦論

排江鬼瞰室貫朽粟紅塵君行誰為容款門定生嗔諒

無綈袍故盡是白頭新天涯阿介老有鼻可揮斤

赤豹負文章歲晚智剝剝渴飲南山霧飢食西山蕨封
孤託脂澤眉頰頰秀發時時一樽酒婆娑弄風月

猛虎倚山號強梁不敢前失身檻穽間搖尾乞人憐男
子要身在萬金自保全雲黃雉兔伏霜鶻莫空拳

生涯共七十去日良已半短長相缺望面

一作向

盡酒可

斷大道體甚寬窘束非達觀莫問夜如何醉從鷄號旦
明馳思千里駕馬怯負荷小人蠹詩書安樂北窻臥歎

空且乞飯兒寒教補破機巧生五兵百拙可用過

代書

阿熊去我時秋暑削甘瓜離別日月除蓮房倒箭韋得
書報平安肥字如栖鴟汝才躍鑪金自必為鎔錫窮年
抱新書挽條咀春葩弄筆不能休屈宋欲作衙屈指推
日星許身上雲霞安知九天關虎豹守夜叉祝田操豚
蹄持狹所欲奢文章六經來汗漫十牛車譬如觀滄海細大
極龍蝦古人以聖學未肯廢百家舊山木十圍齋堂綠

陰遮紅稻香盂飯黃鷄厭食鮭摩挲垂腴腹頗復讀書
耶念汝齒壯矣無婦助烹茶父兄亦憐汝須兒牧犬獐
且伐千章材贈行當馬槌羸糧果後時定隨八月槎覺
民在中林丁丁聞兔置奉身甚和友幹父辨咄嗟臺源
吟松籟先生岸巾紗留客醉風月槃飭供柔嘉仍工朱
絲絃洗心拂竒邪孤臣發楚調傾國怨胡笳把筆學周
鼓字形雖畫沙詩書乃甫好不為蓬生麻元明祖師禪
妙手發琵琶已無富貴心鼓吹一池蛙天民服農圃頗

復秋斂賒下田督耒耔入嶺按新畬悉力輸王賦至今
困生涯知命叔山徒爐香嚴佛花唯思苾芻園脫冠著
袈裟起家望兩李佩金跼朝韉嘉魚在南國宗廟薦鱣
鯨我為萬夫長朝論不齒牙刺頭簿領中蚤虱廢搔爬
世累已纏縛官箴易疵瑕何時煙雨裏驅羊入金華遣
奴迫王事不暇學驚蛇

學一作草

寄陳適用

日月如驚鴻歸燕不及杜清明氣妍暖疊疊向朱夏輕

衣頗宜人裘褐就褫架已非紅紫時春事歸桑柘空餘
車馬跡顛倒桃李下新晴百鳥語各自有匹亞林中僕
姑歸苦遭拙婦罵氣候使之然光陰促晨夜解甲號清
風即有幽蟲化朱墨本非工王事少閒暇幸蒙餘波及
治郡得黃霸邑隣陳太丘威德可資借決事不遲疑敏
手擘泰華頗復集紅衣呼僚飲休假歌梁韻金石舞地
委蘭麝寄我五字詩句法窺鮑謝亦嘆薄領勞行欲問
田舍相期黃公壚不異秦人災我初無廊廟身願執耕

人王公大人 卷四
稼今將荷鉏歸區芋畦甘蔗觀君氣如虹千輩可陵跨
自當出懷壁往取連城價賜地買歌僮珠翠羅廣廈富
貴不相忘寄聲相慰藉

奉送時中攝東曹獄掾

公退蒲團坐後亭短日松風吟萬籟黃葵紫菊委榛叢
雪梅靚粧欲無對遣騎相呼近清樽言君曉鼓前征旆
蒼崖按轡虎豹號野水呼船風雨晦昨日歸來有行色
未曾從容解冠帶府中奪我同官良簡書趣行將數輩

王事君今困馬鞍田園我亦思牛背安得歸舟載月明
鷓鴣白鷗為友生一身不是百年物五湖無邊萬里行
欲招蓑笠同雲水念君未可及吾盟富於春秋貌突兀
睥睨滿世收功名參軍雖卑獄司命多由陰德至公卿
魑魍魎秦相國不滿三尺齊晏嬰丈夫身在形骸外
俗眼那能致重輕

次韻和答孔毅甫

鵬飛鯤化未即逍遙游龍章鳳姿終作廣陵散湓浦鱸

邊督數錢故人陸沉心可見氣與神兵上斗牛詩如晴
雪濯江漢把詠公詩闔且開旁無知音面牆歎我今廢
書迷簿領魚蠹筆鋒蛛網硯六年國子無寸功猶得江
南萬家縣客來欲語誰與同令人熟寐觸屏風竊食仰
愧冥冥鴻少年所期如夢中江頭酒賤樽屢空南山有
田歲不逢相思夜半涕無從千金公亦費屠龍

再用舊韻寄孔毅甫

鑒中之髮蒲柳望秋衰眼中之人風雨俱星散往者託

體同青山健者漂零不相見庾公樓上有詩人平生落
筆寫河漢置驛勤來索我詩自說中郎識元歎我方凍
坐酒官曹為公然薪炙冰硯不解窮愁著一書豈有文
章名九縣奴星結柳送文窮退倚北窻睡松風太阿耿
耿截歸鴻夜思龍泉號匣中斗柄垂天霜雨空獨鴈叫
羣雲萬重何時握手香爐峰不看寒泉濯臥龍

寄題安福李令適軒

琳宮接叢霄淥水連翠微幽花露林薄好鳥娛清輝道

人勤洒掃令尹每忘歸孝慈民父母虎去蝗退飛來思
僚友同歌舞醉紅衣定知與民樂吏瘦吾民肥

寄題安福李令先春閣

宮殿繞風煙江山壯城郭令君莖桃李面春築飛閣春
至最先知雨露偏花藥是日勸農桑冰銷土膏作弦歌
出縣齋裴回問民瘼鷄犬聲相聞嬰此簿領縛安得攜
手嬉烹茶煨鴨脚

和孫公善李仲同金櫻餌唱酬二首

人生欲長存日月不肯遲百年風吹過忽成甘蔗滓傳
聞上世士烹餌草木滋千秋垂綠髮每恨不同時李侯
好方術肘後探神竒金櫻出皇墳刺橐覽霜枝寒窻司
火候古鼎凍膠飴初嘗不可口醇酒和味宜至今身七
十孺子色不衰田中按耰鉏孫息親抱持却笑鄰舍公
未老須杖藜假守富春公秋豪聽民詞夙夜臨公廳歸
臥酸體肢李侯來饋藥期以十日知深中護靈根金鎖
祕玉笈不須許斧子辛勤來玉芝我方困健訟過翁爭

一錐不能鳴弦坐頗似巫馬期敢乞刀圭餘歸和卯飲
危儻令憂民病從此得國醫

寄題安福李令愛竹堂

淵明喜種菊子猷喜種竹託物雖自殊心期俱不俗千
載得李侯異世等風流為官恐是陶彭澤愛竹最知王
子猷寒窻對酒聽雨雪夏簟烹茶臥風月小僧知令不
凡材自掃竹根培老節富貴於我如浮雲安可一日無
此君人言愛竹有何好此中難為俗人道我於此物更

不疎一官窘束何由到

二月二日曉夢會於廬陵西齋作寄陳適用

燕寢著鑪香悵悵閒窻聞夢到
郡城東笑談西齋月行
樂未渠央苦遭晴鳩聒江郎
梅李白士女嬉城闕聞道
潘河陽滿城花秀發頗留載
酒車共醉生塵韞想見舞
餘姿風枝斜蠶髮鄙夫不舉
酒春事亦可悅雨足肥茵
芝沙暄饒笋蕨海牛壓風簾
野飯薰僧鉢飽食愧公家
曾無助毫末勸鹽推新令
王欲惇獨活此邦淡食儉儉

陋深刺骨公困積山丘賈豎但主撮縣官恩乳哺下吏
用鞭撻政恐利一源未塞兔三窟寄聲賢令尹何道補
黥刑從來無研桑顧影愧簪笏何顏課殿上解綬行采
葛

次韻周德夫經行不相見之詩

春風倚樽俎綠髮少年時酒膽大如斗當時淮海知醉
眼概九州何嘗識憂悲看雲飛翰墨秀句詠蛛絲樂如
同隊魚游泳清水湄波濤倏相失歲月秣馬馳客事走

京洛鄉貢趨禮闈艱難思一臂講學抱羣疑邂逅無因
得君居天南陞誰言井底坐忽枉故人詩清如秋露蟬
高柳噫衰遲感歎各頭白民生竟自癡過門不我見寧
復論前期杯酒良難必况望功名垂吉守鄉丈人政盛
犬生菴綠柳陰鈴閣紅蓮媚官池開軒納日月高會無
吏譏琵琶二十四明粧百騎隨為公置樂飲纔可慰路
岐矧公妙顧曲調笑才不羈幕中佳少年多欲從汝嬉
人事喜乖悟曾莫把一卮朝雲高唐觀客枕勞夢思主

翁悲琴瑟生憎見蛾眉君亦脫坎壈有句怨棄遺夜光
暗投人所向蒙詆嗤相思秋日黃西嶺含半規老矣失
少味尚能詩酒為忽解扁舟下何年復來茲寄聲緩行
李激箭無由追

寄傅君倚同年

有情清江水東下投豫章故人江上居不寄書一行相
思對明月談笑如清光向風長歎息孤鴈起寒塘傾寫
鬱結懷因之東南翔姑氏有淑質幽林蘭靜芳願因奉

箕箒蘋藻羞蒸嘗念君方策名要津邁騰驤引車八里
門觀者塞路旁邕邕求匹好羔鴈委潘楊顧惟蓬茅陋
豈能屈東牀眷言南鳴鴈七子伊在桑幸緣一日雅結
好永不忘

次韻章禹直魏道輔贈答之詩

我老倦多故心期馬少游願為春眠蠶吐絲自綢繆翩
翩魏公子閱世無金牛吹噓鼓萬物領袖傾九流昨來
懷白壁往撼西諸侯中丞文武將良非衛霍侔誓開河

源地畫作禹貢州壯士捐軀死鯨鯢尚吞舟客心無一
寸草食隨百憂故人道舊語末路非前籌重來滕王閣
楓葉江上秋章子飽經術賦詩如曹劉太學得虛名權
勢殊未尤禍機發無妄對吏祇搶頭過逢椎鼓赦帝澤
萬邦休章江三年拘解裘賣莫愁麗姬泣又悔生故難
豫謀邂逅識面晚困窮理相收夜語倒樽酒參旌偃風
旒兩公但取醉古今共高丘

次韻道輔雙嶺見寄三疊

明如九井璜美如三危露貞觀魏公孫今來功名誤兒
時漢南柳搖落傷歲暮時不與我謀義和促天步生涯
魚吹沫文彩豹藏霧人言壺公老渠但未得趣飲酒入
壺中茫然失巾屢時不與我謀今君向何處蓮塘倒箭
韋桂影涼一作落霜兔平生知音地下無尺素十夜九
作夢虜乘驚沙度時不與我謀征西枕戈去

次韻道輔旅懷見寄

歲華其將晚霜葉不可風生理魚乞水歸心鳥飛空風

塵化衣黑旅宿夢裙紅人言家無壁自倚筆有鋒轉蓬
且半歲交臂各衰翁扁舟去日遠明月與君同露晞百
年駛麟獲萬事窮壯懷酒澹黃淡恢塞意霧空濛諸公
尚無恙不見陳元龍

寄餘干徐隱甫

江行長遠回風水憂索米相逢解人頤豪士徐孺子鷗
鷺葭葦間煮茗當酌醴夜船餉蒸鵝白髮厭甘旨東江
始分風苔網饋百紙遣兵夜賦詩月冷石齒齒別來星

環天再見艷桃李寄聲良勞勤報我闕雙鯉但聞佳邑
政杻械生菌耳頗聞延諸儒披頌皆詩禮顧予曰下邑
庭聚雨前蟻珥筆誦漢章錐刀爭未已初無得民具名
實正爾爾願聞庖丁方江湖天到水遙知解千牛袖手
笑血指書來儻垂教一作教吾改事從此始

次韻秋郊晚望

道同一指馬心解廢耳目短生行衰謝黃落看草木無
財世不知有酒客可速誰能縛詩書閉門抱羈獨披襟

臨江臯萬籟發空谷風力斜鴈行山光森雨足壁蟲先
知寒機織日夜促居人思行人裘褐誰結束行人喜歸
來邂逅天從欲可奈甌生塵嚴霜凍杞菊

八月十四日夜刀坑口對月奉寄王子難子聞適

用

聞郡中數月
未嘗有燕游

去年對月廬陵郡醉留歌舞蹋金沙今年今夕千峯下
新磨古鑒動菱花寒藤老木被光景深山大澤皆龍蛇
西風為我奏萬籟落葉起舞驚棲鴉遙憐城中二三友

風流慣醉玉釵斜
今夕傳杯定何處
應無二十四琵琶

贈王環中

丹霞不蹋長安道
生涯蕭條破席帽
囊中收得劫初鈴
夜靜月明師子吼
那伽定後一爐香
牛沒馬回觀六道
耆域歸來日未西
一鉏識盡婆娑草

戲和于寺丞乞王醇老米

君不見公車待詔老
詎諧幾年索米長安街
君不見杜陵白頭在同谷
夜提長鑱掘黃獨
文人古來例寒餓
安

得野蠶成蠶天雨粟王家圭田登幾斛干家買桂炊白
玉

贈朱方李道人

顴骨橫穿壽門過年比數珠剩三顆橫吹鐵笛如怒雷
國初舊人唯有我

戲題曾處善尉廳二首

雞埒啄鴈如駕鵝萬里天衢且一波宮錦絡衫弓石八

與人同狀不同科

超然臺

茅茨中安一牀寂天女元非世間色道人今日入關齋

莫散花來染衣襪

不動
卷

寄上高李令懷道

李侯湖海士瓜葛附婚友平生各轉蓬未曾接樽酒寄
聲維勞勤江路常永久節物居然秋蛻蟲悲高柳傳聞
聞學館鼓士薦豚韭能使珥筆黔稍知忠信有矯虎縮
瓜距詩禮開戶牖事勝感邦人伐山謀不朽武功筆如
椽文字爛漫久謂予有書癖摹篆寫科斗不珍金石刻

要我一揮肘安知乃兒戲敢傳萬世後摩拂幼婦篇慙
非換鵝手公其勤勞來嘉政民父母不用琢蒼崖豐碑
在人口

謝文瀨元豐上文藁

虎豹文章非一斑乳雉五色蜃胎寒天生材器各有用
相如名獨重太山風流小謝宣城後少年如春膽如斗
裕陵書藁公不朽持心鐵石要長久

讀方言

八月梨棗紅繞牆風自落江南風雨餘未覺衣衾薄壁

蟲憂寒來催婦織衣

去聲

著

音斫

荒畦杞菊花猶用充羹臠

連日無酒飲令人風味惡頗似揚子雲家貧官落魄忽

聞輶軒書誥讀勞輔齟虛堂漏刻間九土可領略願多

載酒人喜我識字博設心更自笑欲過屠門嚼往時抱

經綸待價一丘壑卜師非熊羆夢相解靡索所欲吾未

奢儻使耕可獲今年美牟麥廚饌豐餅拓摩挲腹中書

安知非糟粕

送昌上座歸成都

昭覺堂中有道人龍吟虎嘯隨風雲雨花經席冷如鐵
一滕日轉一二輪寶勝蓬蒿荒小院埋沒醯雞三隻眼箇
是江南五味禪更往叅尋莫擔板

送彥孚主簿

斯文當兩都江夏世無雙叔度初不言漢庭望風降中
間眇人物潛伏老崆峒許江反本朝開典禮棧樸作株椿
世父盛文藻如陸海潘江三戰士皆北轡弓錦韜杠白

衣受傳詔短命終螢窻夢升臥南陽耆舊無兩龐空鏡

歐陽銘松風悲隴隴

雙音

四海羣從間爾來頗瑱

士耕反

淙

士江反

主簿吾宗秀其能任為邦軀幹雖眇小勇沈鼎可

扛擇師別陳許取友觀羿逢折腰佐髯令邑訟銷吠龙

時邀府中飲下箔蠟燒缸紅裳笑千金清夜酒百缸同

僚有惡少嘲謔語亂咙君但隱几笑諸老嘆敦龐况迺

工朱墨氣和信甚砭持此應時須十年擁麾幢相逢常

鞅掌衙鼓趨蹙蹙

音

簿書敗清談汗顏吏樅樅

窻

臨分

何以贈要我賦蘭茝黃華雖衆笑白雪不同腔野人甘
芹味敢饋厭羊羶顧余百短拙飽腹慙降音肛許兵反維
思解官去一丘事耕糴君當取富貴鐘鼓羅擊撞伏
藏繼繼徑猶想足音跲

寄朱樂仲

故人昔在國北門鄰舍杖藜對樽酒十五餘年乃一逢
黃塵急流語馬首懶書愧見南飛鴻君居三十六峯東
我心想見故人面曉雨垂虹到望崧

從王都尉覓千葉梅云已落盡戲作嘲吹笛侍兒
若為可耐昭華得脫帽看髮已微霜催盡落梅春已半
更吹三弄乞風光

次韻子瞻書黃庭經尾付蹇道士

琅函絳簡藥珠篇寸田尺宅可蘄仙高真接手玉宸前
女丁來謁粲六妍金鑰閉欲形完堅萬物蕩盡正秋天
使形如是何塵緣蘇李筆墨妙自然萬靈拱手書已傳
傳非其人恐飛騫當付驪龍藏九淵蹇侯奉告請周旋

緯蕭探手我不眠

次韻叔父夷仲送夏君玉赴零陵主簿

田實堂上酒未醉已變態何如東陵瓜子母相鉤帶富
貴席未暖珠玉作災怪茅茨雖長貧終有懿親在丈人
困州縣短髮餘會最居然枳棘棲坐閱歲月代青雲已
迷津濁酒未割愛簿領能無休飭餽喚魚菜羈旅苦地
徧江湖見天大萬里一帆檣長風可倚賴因行訪幽禪
頭陀煙雨外

謝曹子方惠二物二首

飛來海上峯琢出華陰碧注香上裊裊映我鼻端白聽

公談昨夢沙暗雨矢石今此非夢即煙寒已無迹

博山爐

短喙可候煎枵腹不停塵蟹眼時探穴龍文已碎身茗

椀有何好煮餅被寵珍石交諒如此湔袂長日新

煎茶餅

送曹子方福建路運判兼簡運使張仲謀

曹侯黃須便弓馬從軍賦詩橫槊間阿瞞文武如兕虎
遠孫風氣猶斑斑昨解弓刀丞太僕坐看牧駒十二閑

遠方不異輦轂下詔遣中使哀恫鰥吾聞斯民病鹽策
天有雨露東南乾謝君論河東禹貢詰難蠹起安如山
老郎不作患失計凜然宜著侍臣冠願公不落謝君後
江湖以南尚少寬百城閱人如閱馬泛駕亦要知才難
鹽車之下有絕足敗羣勿縱為民殘官焙薦壁天解顏
淪湯試春聊加食子魚通印壕破山不但蕉黃荔子丹
道逢使者漢郎官清溪弭節問平安天子命我參卿事
奮髯相對亦可歡迴波一醉嘲拷棹山一作驛官梅破

小寒

戲贈曹子方家鳳兒

東芽入湯師子吼荔子新剥女兒頰鳳郎但喜風土樂
不解生愁山疊疊目如點漆射清揚歸時定自能文章

莫隨閩嶺三年語轉却中原萬籟簫

閩嶺一作阿國

題老鶴萬里心

仙人駕飛騎朝會白雲衢老驥不服乘清唳徹九虛野
田篁竹底毳毼伴雞鳬時因長風起猶欲試南圖

題韋偃馬

韋侯常喜作羣馬杜陵詩中如見畫忽開短卷六馬圖
想見詩老醉騎驢龍眠作馬晚更妙至今似覺韋偃少
一洗萬古凡馬空句法如此今誰工

子瞻題狄司進雪林石屏要同作

翠屏臨研滴明窻翫寸陰意境可千里搖落江上林百
醉歌舞罷四郊風雪深將軍貂狐暖士卒多苦心

和曹子方雜言

正月尾垂雲如覆孟鴈作斜行書三十六陂浸煙水想
對西江彭蠡湖人言春色濃如酒不見插秧吳女手冷
御小塢頗藏春張侯官居柳對門當風橫笛留三弄燒
燭圍棋覆九軍盡是向來行樂事每見琵琶憶朝雲只
今不舉蛾眉酒紅牙捍撥網蛛塵曹侯束書丞太僕試
說相馬猶可人照夜白真乘黃萬馬同秣隨低昂一矢
射落皂鵬雙張侯猶思在戎行橫山虎北開漢疆冷卿
智多髮蒼浪牛刀發硎思一邦政成十緞舞紅粧兩侯

不如曹子方朶頤論詩蝟毛張龜藏六用中有光何時
端能俱過我掃除北寺讀書堂菊苗煑餅深注湯更碾
盤龍不入香

送張材翁赴秦簽

金沙醑釀春縱橫提壺粟留催酒行公家諸父酌我醉
橫笛送晚延月明此時諸兒皆秀發酒間乞書藤紙滑
北門相見後十年醉語十不省七八吏事衮衮談趙張
乃是樽前綠髮郎風悲松丘忽三歲更覺綠竹能風霜

去作將軍幕下士猶聞防秋屯虎兕只今陛下思保民
所要邊頭不生事短長不登四萬日愚智相去三十里
百分舉酒更若為千戶封侯儻來爾

摩詰畫

丹青王右丞詩句妙九州物外常獨往人間無所求袖
手南山雨輞川桑柘秋胸中有佳處涇渭看同流

和劉景文

追隨城西園殘暑欲退席夜涼雨新休城譙挂蒼壁佳

人攜手嬉調笑忘日夕劉侯本將家今為讀書客詩名
二十年風雅目推激牛鐸調黃鐘薪餘合琴瑟食無千
戶封句有萬人敵頗類鄴侯家連牆架書冊殘編汲縣
冢半隸鴻都壁渠成亦秦利願公多購獲竟須卜比鄰
勞苦相飲食身有小醜女已自喜翰墨要傳未見書遮
眼差有益人生但安樂券外豈吾力分鹿誰覺夢亡羊
路南北公今百寮底雪髮不勝憤愛公欲湔拂顧我已
頭白

寄忠玉提刑

市骨斲千里量珠買娉婷
駘參逸駕西子泣深屏
吾人材高秀胸次別渭涇
嚴能喜劇部持節按祥刑
萑蒲稍衰息卽縣或空圉
讀書頭愈白見士眼終青
今時斤斧地虛次待發硎
早晚紫微禁占來有使星

送呂知常赴太和丞

我去太和欲暮矣
呂君初得太和官
邑中亦有文字樂
惜不同君澗谷槃
觀山千尺夜泉落
快閣六月江風寒

往尋佳境不知處掃壁覓我題詩看

和答莘老見贈

往歲在辛丑從師海瀕州外家有行役拜公古邗溝兒
曹被鑒賞許以綜九流仍許歸息女采蘋助春秋斯文
開津梁盛德見虛舟離合略十年每見仰清修久次不
進遷天祿勤校讎文武修衮職諫垣始登收身趨鄴公
城逐臣既南浮變彼丞中饋家庭供百羞堂堂來問寢
忽為雲霧休遺玩猶在篋汝水遶墳丘南箕與北斗日

月行置郵相逢輦轂下存沒可言愁當年小兒女生子
欲勝裘毼越委琴瑟江湖拱松楸持節轉七郡治功無
全牛還朝蒙嗟識明月豈暗投抱被直延閣疎簾近奎
鉤三生石上夢記是復疑不隱几付天籟閱人如海鷗
襟懷俯萬物顏鬢與百憂長歌可當泣短生等蜉蝣悲
歡令人老萬世略同流軒冕來逼身白蘋晚滄洲履拂
知道肥淨室見天遊小人樂蛙井癡甚顧虎頭世緣真
嚼蠟骨相謝封侯松根養茯苓歲晏望華輈

老杜浣花谿圖引

拾遺流落錦官城故人作尹眼為青碧雞坊西結茅屋
百花潭水濯冠纓故衣未補新衣綻空蟠

一作淨

胸中書

萬卷探道欲度羲皇前論詩未覺國風遠干戈崢嶸

一作

終風且霾

暗寓縣杜陵韋曲無雞犬老妻稚子且眼前弟妹

飄零不相見此公樂易真可人園翁溪友肯卜鄰鄰家

有酒邀皆去得意魚鳥來相親浣花酒船散車騎野塙

無主看桃李宗文守家宗武扶落日蹇驢馱醉起願聞

解鞍脫兜鍪老儒不用千戶侯中原未得平安報醉裏

眉攢

一作清揚之間

萬國愁生綃鋪墻粉墨落平生忠義今寂

寞兒呼不蘇驢失脚猶恐醒來有新作常使詩人拜畫
圖神膠續絃千古無

奉謝劉景文送團茶

劉侯惠我大玄壁上有雌雄雙鳳跡鵝溪水練落春雪
粟面一杯增目力劉侯惠我小玄壁自裁半壁煮瓊糜
收藏殘月惜未碾直待匡衡來說詩絳囊團團餘幾壁

因來送我公莫惜箇中渴羌飽湯餅雞蘇胡麻煮同喫
謝景文惠浩然所作廷珪墨

廷珪質墨出蘇家麝煤添澤紋烏鞞柳枝瘦龍印香字
十襲一日三摩挲劉侯愛我如桃李揮贈要我書萬紙
不意神禹治水圭忽然入我懷袖裏吾不能手抄五車
書亦不能寫論付官奴便當閉門學水墨灑作江南驟
雨圖

奉和公擇舅氏送呂道人研長韻

奉身玉壺冰立朝朱絲絃妙質寄郢匠素心乃林泉刀
耕不罪歲嘉穀有逢年校書天祿閣莢竹老風煙提攜
寒泉泓松煤厭磨研藉甚在臺省六經勤傳箋諫草蠹
穿穴江湖渺歸舩春官酌典禮日月麗秋天少也長母
家學海頗尋公諸公許似舅賤子豈能賢轅駒蒙推挽
官次奉丹鉛新詩先舊物包送比青氈繆傳黃梅鉢未
印少林禪汲井滌敗墨蒼珪謝磨鐫玉蟾瀉明滴要須
筆如椽眷求盡耆德舅氏旦進遷山龍用補衮舟楫功

濟川當身任百世舊學不虛捐私持殺青簡緝綴報餐
錢屢書願無愧儻繼麟趾篇

再和公擇舅氏雜言

外家有金玉我躬之道術有衣食我家之德心使我蟬
蛻俗學之市烏哺仁人之林養生事親沆師古炊玉爨
桂能至今歲莫三十裘食口三百指寒不緝江南之落
毛飢不拾狙公之橡子平生荆雞化黃鵠今日江鷗作
樊雉人言無忌似牢之挽入書林覩文字更蒙著鞭翰

墨場贈研水蒼珪玉方蓬門繫馬晚色淨茅簷垂虹秋
氣涼湔拂垢面生寒光漢隸書呂規其陽呂翁之治與
天通不但澄湓燒鉛黃初疑蠻溪水中骨不見鸛鵒目
突兀但見受墨無聲松花發頗似龍尾琢紫烟不見羅
縠紋粼粼但見含墨不泄如寒淵往在海瀕時晨夕親
几杖恪居有官次遣吏問無恙撫摩寶泓置道山鬱鬱
秀氣似舅眉宇間其重可以回進躁之首其溫可以解
橫逆之顏烏虡端是萬乘器紅絲潭石之際知才難

次韻答王四

病懶百事廢不惟書問疎
新詩苦招喚是日鎖直廬
潢汙深一尺大道覆行車
晴夜遙相似秋堂對望舒

題畫鵝鴈

駕鵝引頸回似我胷中字
右軍數能來不為口腹事
水國鴻鴈秋烟沙風日麗
莫遣弓角鳴驚飛不成字

送六十五弟賁南歸

風驚鴻鴈行吹落秋江上
為掃碧巖邊問叔今無恙

贈陳師道

陳侯學詩如學道又似秋蟲噫寒草日晏腸鳴不俛眉
得意古人便忘老君不見向來河伯負兩河觀海乃知
身一蠹旋牀爭席方歸去秋水黏天不自多春風吹園
動花鳥霜月入戶寒皎皎十度欲言九度休萬人叢中
一人曉貧無置錫人所憐窮到無錫不屬天呻吟成聲
可管絃能與不能安足言

松下淵明

南渡誠草草長沙慰勤艱終風霾八表半夜失前山

一本

此兩句云平生一杯酒政在管葛間遠公香火社遺民文字禪雖非老翁

事清尚亦可觀松風自度曲我琴不須彈客來欲開說
觴至不得言

十四弟歸洪州賦莫如兄弟四章贈行

惱人自作樂休休莫莫相看將白頭止有不如昨
北來哺慈烏南歸護爾雛昨夜雲飛鴈相隨我不如
志欲收九族別離乃同生誰能成此意唯有孔方兄

大父無恙時刻意教子弟歸掃松楸下灑我萬里涕

題李夫人偃竹

孤根偃蹇非傲世勁節癭枝萬壑風
閨中白髮翰墨手落筆乃與天同功

贈吳道士

吳仙十二碁一擊玄關應探人懷中事如月入清鏡

戲答仇夢得承制

仇侯能騎矍鑠馬席上亦賦競病詩
玄冬未雷蒼蛇臥

玉山無禾天馬饑三年荷戈對搖落十倍乞弟亦可縛
何如萬騎出河西捕取弄兵黃口兒

和任夫人悟道

夫亡子幼如月魄摧盡蛾眉作詩客二十餘年刮地寒
見兒成人乃禪寂萬事新新不留故瘦藤六尺持門戶
煩惱林中卽是禪更向何門覓重悟

山谷外集卷四